

الجمعية التونسية للقانون الدستوري



# الدستور بالدّارجة

اعداد

سلسبيل القليبي  
سلوى الحمروني  
هناء بن عبدة  
شوقي قّداس

مراجعة

فرحات الحرشاني  
أنور معلى

## الفهرس

1	شرح أسباب الدستور بالدرجة
3	التوطنة
5	الباب الأول. المبادئ العامة
10	الباب الثاني. الحقوق والحريات
18	الباب الثالث. السلطة التشريعية
26	الباب الرابع. السلطة التنفيذية
26	القسم الأول. رئيس الجمهورية
35	القسم الثاني. الحكومة
41	الباب الخامس. السلطة القضائية
43	القسم الأول: القضاء العدلي والإداري والمالي
44	الفرع الأول: المجلس الأعلى للقضاء
46	الفرع الثاني: القضاء العدلي
47	الفرع الثالث: القضاء الإداري
48	الفرع الرابع: القضاء المالي
49	القسم الثاني. المحكمة الدستورية
52	الباب السادس. الهيئات الدستورية المستقلة
52	القسم الأول. هيئة الانتخابات
53	القسم الثاني. هيئة الاتصال السمعي البصري
53	القسم الثالث. هيئة حقوق الإنسان
54	القسم الرابع. هيئة التنمية المستدامة وحقوق الأجيال القادمة
54	القسم الخامس. هيئة الحوكمة الرشيدة ومكافحة الفساد
55	الباب السابع. السلطة المحلية
58	الباب الثامن. تعديل الدستور
59	الباب التاسع. الفصول الختامية
59	الباب العاشر. الأحكام الانتقالية

## شرح أسباب الدستور بالدارجة

دستور تونس الجديد كُمل نهار 27 جانفي 2014 ان شاء الله مبروك علينا. أما على خاطر نحبّوه يكون دستور التوانسة الكل حبينّا نكتبوه بالتونسي باش الناس الكلّ تنجّم تقراه وتسمعو وبالأخص تفهمو .

برشة توانسة ما يعرفوش يقرأو ويكتبو اما لازم نلقاؤو في كل عايلة واحد ينجم يقرأ للبقية بالدارجة.

حاولنا نستعملو الكلمات الدارجة أكثر في لوغتنا متاع كل يوم وهذا ما كانش ديما سهل خاصة بالنسبة للكلمات الهامة في القانون. هذاكا علاش تليزينا باش نفسرو بعض الحاجات كيف ما لقيناش كيفاش نقولوها بالدارجة.

وهذا الكل على خاطر نحبّو كل واحد منا يعرف حقّو ويفهم إليّ فمّا قانون إسمو الدستور يضمّنهلّو وفما قاضي كّفو الدستور هذا بمهمة حماية حقوق الناس الكل وحتى إذا كان الدولة هي إليّ تعدّات عليهم القاضي من واجبو باش ياخذهم منها

لكن نحبّو زادة كل واحد يعرف حق غيره وحق الدولة عليه وما يقولش ما فيباليش وإلا ما نعرفش.

ويلزم نعرفو أنو موش السلطة برك هي إليّ تعطي قيمة للدستور يعني تخليّ الناس الكلّ تعتبرو قانون وأعلى قانون في الدولة وما عندهاش الحق باش تخالفو.

بالعكس أحنا شفنا كيفاش قبل كان عندنا دستور لكن حتى حدّ ما كان يسمع بيه وإلا يهتّم بيه وكيفو كيف بلاش : حقوقنا كانت مهضومة على خاطر السلطة هي نفسها كانت تعمل إليّ تحبّ كايّو ما فمّش دستور. ولذا أحنا زادة مسؤولين على القيمة إليّ باش ياخذها دستورنا

الجديد: يا إماماً باش نمّو بيه ونراو فيه الحدّ إلي يلزم السلطة تتقبّد بيه وقتلّي تسير البلاد والعباد ووقتها كيما يقولو إلي عطاك حبل كتّفو بيه يعني يلزمنا ناقفو لبلادنا ولرواحنا ولاولادنا وبناتنا وكيف نراو السلطة وإلا أي واحد خرج على الدستور نشهرو بيه في الصحافة وإلا نقدمو ضدّو عريضة وإلا نشكيو للقاضي المفيد نعملو كل ما يسمحلنا بيه الدستور باش نرجّعوه.

أما اذا كان كل واحد يعمل روجو ما فيبالوش ويقول اخطا راسي واضرب الدستور موش مشكلتي و نخليوه للسياسيين والقانونجية ووقتها نرجعو وين كّنا ونخليو أي واحد يعبث بيه وبيننا.

ليوم نتّمناو أنو باللهجة هادي كل تونسي وتونسية يكون فكرتو الخاصة يكون فكرتو الخاصة على كل ما جاء فيه وما يقعدش يستنّي شكون يقرالو وإلا يفسرلو.

الجمعية التونسية للقانون الدستوري جمعية علمية، والناس إلي ترجمو الدستور باللغة الدارجة أساتذة متاع قانون اما بالخدمة الي عملوها يحبو التوانسة الكل تفهم الدستور عالقليلة بصورة عامة وماذا بينا الي يعرف يقرأ فيكم يقرى الدستور لغيرو بصوت عالي على خاطر الحرية زادة يلزمها صوت عالي.

## الجمعية التونسية للقانون الدستوري

## التوتونة

أحنا نواب الشعب التونسي أعضاء المجلس الوطني التأسيسي:

على خاطر نَعْتَرِّوْ بِشعبنا إِيّ قَوم الاستعمار حتى خذا الاستقلال ومنْ بعد بْنا دولة وتخلّص من سلطة تحكّمت فينا كيف ما حبّت وما خلاتناش نتحرّكو، وعلى خاطر نحبوْ نعبّرو على الإرادة الحرّة متاع شعبنا ونحبوْ نُحَقِّقْ أهداف ثورة الحرية والكرامة، ثورة 17 ديسمبر 2010 - 14 جانفي 2011 وعلى خاطر يلزمنّا نكونو أوفياء لدمّ شهدائنا إِيّ رفضو الذلّ وأوفياء لتضحيات جُودنا من التونسيين والتونسيات من قديم الزمان وباش ما عادش نرجعو للظلم والقهر والفساد،

وباش نعبّرو على تمسّك شعبنا بتعاليم الاسلام وأهدافو المتميّزة بالتفتّح وإِيّ عمرها ما كانت متطرّفة وباش نتمسّكو بالقيم إِيّ من غيرها الواحد منّا ما يكونش إنسان، وباش ندافعو على مبادئ حقوق الانسان مرا وإلّا راجل مهما كان لونو وإلّا أصلو وإلّا دينو وإلّا لوغتو وإلّا طريقة تفكيرو وإلّا البلاد إِيّ تولد فيها وإلّا إِيّ يعيش فيها، هالمبادئ إِيّ ترفع من قيمة الإنسان،

وعلى خاطر نحبوْ ناخذو الحاجات الباهية الكل إِيّ جابتها حضارتنا القديمة والغنية والمتنوعة ومن بينها حركة الإصلاح متاعنا إِيّ بدأت من القرن 19 وإِيّ فيها شيء جاي من العروبة وشيء من الإسلام وشيء من الحضارات الإنسانية الأخرى وعلى خاطرنا شادين صحيح في إِيّ عملو شعبنا الكل باش بْنا الوطن هذا،

وعلى خاطر نحبوْ نَبْنِيْوْ نظام جمهوري ديمقراطي يشارك فيه الشعب الكلّ في السلطة في دولة مدنية يعني دولة لا يحكم فيها العسكر ولا رجال الدين لكن يحكم فيها كان الشعب بواسطة ناس يختارهم وينتخبهم بكل حرية وحتى حدّ ما يفكّ فيه الحكم بالقوّة وإلّا يشدّو على

طول، وعلى خاطر نحبو نظام ما يكونش فيه الحكم عند شخص واحد لكن تكون فيه السلطة مقسمة على برشة أطراف واحد يعمل القوانين وهو البرلمان وواحد ينفذ القوانين هاذي ويختار سياسة الدولة وهو رئيس الجمهورية والحكومة وواحد يحكم بين الناس ويفض النزاعات وهو القاضي وكل واحد من الأطراف هاذي يخدم خدمتو وفي نفس الوقت يراقب الطرف الآخر باش ما يطغاش، وباش تبقى السُلط هاذي في علاقة متوازنة بينها، وعلى خاطر نحبو التنافس السياسي مبني على حق كل واحد باش يعمل وإلا يشارك في جمعية وإلا حزب سياسي وإلا نقابة وباش تكون الجمعيات والأحزاب والنقابات هاذي متنوعة ومتعددة وما نرجعوش لنظام الحزب الواحد والعسة على الجمعيات والنقابات، ويضمن إدارة في خدمة الناس الكل ما تكونش على ذمة حزب وإلا شخص، وعلى خاطر نحبو حكم رشيد ونحبو دولة ينطبق فيها القانون على الناس الكل وقضاء مستقل ما يخضعش لتعليمات الحكومة وإلا رئيس الجمهورية ودولة تحترم حقوقنا وحرماننا وتضمن المساواة بين الناس الكل في الحقوق والواجبات وتضمن زادة العدل والمساواة بين الجهات،

وعلى خاطر الانسان مخلوق مكرم وعلى خاطر نحبو ندعمو انتماننا الثقافي والحضاري للأمة العربية الاسلامية وانطلاقا من وحدة بلادنا القابمة على إنا الكلنا أولاد وبنات تونس والكلنا أخوة متضامنين ونمئو بالعدالة الاجتماعية وعلى خاطرنا نحبو ندعمو الوحدة بين دول المغرب العربي إلي هي خطوة لتحقيق الوحدة العربية وعلى خاطرنا واعين بتكاملنا مع الشعوب الإسلامية والإفريقية ونحبو نتعاونو مع شعوب العالم الكل وننصرو المظلومين وبين ما كانوا وندعمو حق الشعوب في تقرير مصيرها وندعمو حركات التحرير العادلة وأولها حركة التحرير الفلسطينية ونعبرو على رفضنا لكل أشكال الاستعمار والعنصرية،

وعلى خاطرنا وواعين بخطورة التلوث على بيئتنا يعني على صحّتنا وصحة أولادنا وأحفادنا وواعين بخطورة تدمير الموارد الطبيعية كيف الماء مثلا على حياتنا ومستقبل أولادنا وعلى خاطر نحبوّ التوانسة يختارو مصيرهم بأنفسهم ويصنّعو مستقبلهم من غير وصاية من حتى حدّ، التوانسة إلي يمتّو إتو العُلم والعمل والإبداع هوما إلي يعطيُو للإنسان قيمتو كإنسان وإلي كانوا ديمّا في طليعة الشعوب وواعين إتو يلزمهم يشاركو في صنع الحضارة الإنسانية من غير ما يفرّطو في حقّهم باش ياخذو قراراتهم بكلّ استقلالية ومع دعمهم للسلم في العالم وللتضامن بين البشرية الكلّ،  
من أجل هذا الكلّ وبإسم الشعب نثوكلّو على الله ونكتبو الدستور هذا.

## الباب الأول. المبادئ العامة

**الفصل 1.** تونس دولة حرّة مسنّقة ذات سيادة يعني حتّى دولة وإلا سلطة أخرى ما تتدخّل فيها، وتونس مسلمة ولوغتها العربية معنتها أغلبية شعبيها مسلم ولوغتو العربية ونظامها جمهوري يعني الشعب هو إلي ينتخب رئيس الجمهورية موش كيما الملوكية يكون فيها الحكم بالوراثة.  
الفصل هاذا ما إنجموش نبدلوه.

**الفصل 2.** تونس دولة مدنية يعني دولة يحكموها المواطنين والمواطنات عن طريق ناس ينتخبوهم بكلّ حرية. والناس هادم يحكمو بقوانين يعملوهم هوما في مجلس نواب الشعب. يعني الدولة المدنية هي دولة لا يحكم فيها العسكر ولا رجال الدين، ما يحكم فيها كان الشعب بإرادتو.

وتونس دولة تقوم على المواطنة يعني الناس الكلّ فيها كيف كيف يربط بينهم انتماءهم لأرض تونس. وتونس زادة دولة فيها القانون فوق الناس الكلّ.

الفصل هذا ما إنجموش نبّلوه.

**الفصل 3.** الشعب هو صاحب السيادة يعني الكلمة الإخرّة ليه وهو أصل السلطات الكلّ إلي يمارسها إمّا بطريقة غير مباشرة وقتلي يوكل عليها نواب ينتخبهم وإلاّ بطريقة مباشرة عن طريق الاستفتاء يعني وقتلي يطلبو متو باش يقول "إي" وإلاّ "لا" على مشروع قانون وإلاّ على نص دستوري وإلاّ على أيّ مسألة تشاورو فيها السلطة.

**الفصل 4.** علم الجمهورية التونسية أحمر في وسطو دُورَة بيضا فيها نجمة وهلال حمُر والقانون هو إلي يُضبط لقياس متاع الدُورَة والنجمة والهلال.

النشيد الرسمي للجمهورية هو "حماة الحمى" والقانون هو إلي ينظمو وشعار الجمهورية هو "حرية، كرامة، عدالة، نظام".

**الفصل 5.** الجمهورية التونسية جزء من المغرب العربي إلي متكوّن من موريتانيا والمغرب والجزائر وليبيا وتونس إلي تعمل جهدها باش توحد بيناتهم.

**الفصل 6.** الدولة راعية للدين يعني إنها هي المسؤولة على الشؤون متاع الديانات الكلّ.

وهي إلي تُضمن لكل واحد حرية إنو يختار الدين إلي يرتاحلو وإلي مُفتنّع بيه وإلاّ بيدلو وإنو يمن وإلاّ ما يمتنّش بالدين هذا كيما يقلو ضمير و موش كيما يفرضوه عليه الناس.

الدولة هي المسؤولة على ضمان حرية كلّ واحد منا باش يؤدّي وإلاّ ما يؤدّيش شعائرو الدينية يعني مثلا ما تتعرض لحتى حدّ يحبّ يصلي وإلاّ يصوم مهما كان دينو.

والدولة يلزمها:

تمنع أنو المساجد وأي أماكن عبادة أخرى تولي بلايص تستغلها أحزاب سياسية،

تعوّد الناس على قيم الاعتدال والتسامح بينهم،  
تحمي المقدسات وما تخلّيش حتى حدّ يتعدّى عليها،  
تمنع الناس من تكفير بعضهم ومن الدعوة لكره بعضهم ومن  
استعمال العنف ضدّ بعضهم، ومن واجبها إنّها تاقف في وجه كل  
واحد يقوم بالممارسات هاذي.

**الفصل 7.** الأسرة هي السّاس متاع المجتمع والدولة يلزم تحميها.

**الفصل 8.** الشباب هو القوة الّلي تبني البلاد وهذاكلا علاش الدولة يلزم  
تعمل كلّ جهدها باش تُقرّيه وتكوّنو وتعطيه فرصة باش يورّي آس  
ينجم يعمل باش يحسّن وضعيّو لكن زادة باش يخدم بلادو ويقدم بيها  
في المجال الاقتصادي والاجتماعي والسياسي والثقافي ويلزمها  
تعطيه الثقة وتحمّلو المسؤولية.

**الفصل 9.** المواطن عندو واجبات كيما عندو حقوق وأهمّ الواجبات  
هاذي هو إتو يحمي بلادو من العدو الخارجي لكن كذلك من كلّ من  
يحاول تقسيمها،

والخدمة العسكرية واجبة زادة على المواطنين الكلّ والقانون هو الّلي  
يضبط كيفاش تكون الخدمة هاذي.

**الفصل 10.** دفعان الضرايب ومشاركة الناس الكلّ في المصاريف  
العامّة اللّازمة مثلا لبنيان المكاتب والسيطارات والكيّاسات واجب  
على المواطنين الكلّ على أساس الإنصاف والعدل يعني كلّ قدير  
وقدرو،

والدولة تعمل كلّ ما يلزم باش تُجبر الناس على دفعان الضرايب  
وتقاوم كلّ من يحاول يغشّ وإلا يتهرّب من دفعانها وكل مواطن  
حسب مدخولو.

الدولة تعمل :

على حسن التصرف في المال العام يعني على منع تبذير فلوسي  
وفلوسك إلي تأخذهم مالمضريب إلي ندفعو هالها،  
على صرف المال هادا حسب أولويات الاقتصاد متاع البلاد  
وعلى منع الفساد كيما الرشوة مثلا وإلا سرقة فلوس الدولة،  
على حماية سيادة تونس يعني منع كل ما يجبر الدولة على  
الخصوع لأوامر دولة أخرى خاطر سلفتها فلوس مثلا.

**الفصل 11.** كل واحد يولي رئيس جمهورية وإلا رئيس حكومة وإلا  
وزير وإلا عضو في مجلس نواب الشعب وإلا عضو في الهيئات  
الدستورية كيما هيئة الإنتخابات وإلا عندو منصب كبير، يلزمو وقتلي  
يتولى المنصب هادا ووقت إلي يخرج متو يصرح بالأملك إلي عندو  
الكل باش الناس تعرف نهارت إلي يخرج كان سرق فلوس الشعب  
وإلا لا.

**الفصل 12.** يلزم الدولة تحقق العدالة الإجتماعية كيما يلزمها تحقق  
التنمية موش لينا أحنا برك أما لينا ولأولادنا وبناتنا ولكل الأجيال  
القادمة،

والدولة يلزمها تتلهم بالجهات الكل في مجال التعليم والصحة  
والتشغيل وغيرها موش تعطي لجهات وتخلي جهات أخرى مهمشة،  
وإذا كان لزم تعطي أكثر للجهات المحرومة من الجهات الأخرى باش  
تلقها.

والدولة يلزمها زادة تستحفظ على الثروات الطبيعية متاع البلاد كيما  
الماء وإلا الفسفاط وما تبذرهمش.

**الفصل 13.** الثروات الطبيعية متاع البلاد كيما الماء وإلا الفسفاط وإلا  
النفط وغيرهم هي ملك الشعب الكل والدولة هي إلي تتحكم فيها بإسم  
الشعب.

والكئتراتوات إلي تتعمل لإستغلال الثروات هادي يلزم توافق عليها  
لجنة خاصة في مجلس نواب الشعب والاتفاقيات والكئتراتوات إلي

تتعمل مع دول أخرى وإلا شركات أجنبية بخصوص الثروات هاذي يلزم يوافق عليها مجلس نواب الشعب وهكا الشعب ينجم يراقبها.

**الفصل 14.** الدولة التونسية تُشجّع اللامركزية يعني يلزم نُخَلّي البلديات والجهات والأقاليم تحكّم نفسها بِنَفْسِهَا فِي الْمَسَائِلِ إِلَيَّ تَهَمُّهَا وَإِلَيَّ يَضْبِطُهَا الْقَانُونُ. وَهَذَا مَا يَمْنَعُشْ إِنْو تُونِسْ تَبْقَى دَوْلَةٌ وَاحِدَةٌ وَمَوْحَدَةٌ.

**الفصل 15.** الإدارة العمومية في خدمة المواطن والمصلحة العامة والإدارة يلزم تكون محايدة يعني ماهي تابعة لحتى جهة سياسية وإلا غيرها وتعامل الناس الكلّ كيف كيف.

الإدارة ما يلزمش تعطّل مصالح المواطن وهاذاكا علاش يلزم تخدم باستمرار والناس الكلّ عندها الحق باش تعرفها كيفاش تخدم وعلى أيّ أساس تاخذ القرارات متاعها وكيفاش تتصرف في الأموال إليّ تاخذها من ميزانية الدولة. وهاذا إليّ نُسَمِّيُوهُ شَفَافِيَّةَ الْإِدَارَةِ. وَالْإِدَارَةُ زَادَةٌ يَلْزِمُهَا تَمْشِي مَعَ الْحَقِّ وَتَخْدُمُ خِدْمَةً مَتْقُونَةً وَيَلْزِمُهَا تَعْرِفْ إِنْهَا بَاشْ تَتْحَاسِبْ إِذَا غَلَطَتْ.

**الفصل 16.** حتى حزب سياسي ما عندو الحق باش يستغلّ المكاتب والمعاهد والجامعات ويعمل فيها السياسة والدولة هي المسؤولة على احترام المبدأ هازا.

**الفصل 17.** الدولة وحدها هي إليّ عندها الحق باش تكون قوات مسلحة وقوات الأمن الوطني كيما يُضْبِطُهُمُ الْقَانُونُ وَالْقَوَاتُ هَازِي الْهَدَفُ مَتَاعِهَا خِدْمَةُ الْمَصْلَحَةِ الْعَامَّةِ.

**الفصل 18.** الجيش التونسي جيش جمهوري يعني يحمي إرادة الشعب ويدافع عليه والقوات العسكرية مُنْضَبَطَةٌ يَعْنِي مُنْظَمَةٌ وَتَحْتَرَمُ الْقَانُونُ وَالْأَوَامِرُ مَتَاعِ رُؤَسَاءِهَا مَوْشِ كُلِّ ضَابِطٍ وَإِلَّا عَسْكَرِي فِيهَا يَعْمَلُ إِلَيَّ يَجِبُ وَالْقَانُونُ هُوَ إِلَيَّ يَنْظُمُ الْقَوَاتُ هَازِي.

مهمة الجيش الوطني هي الدفاع على بلادنا وعلى استقلالها وحمايتها من التقسيم. الجيش الوطني يلزم يكون محايد يعني ما يَنْبَع حتى جهة سياسية وما يلزمش يخدم لحسابو وإلا يحاول ياخذ بلاصة السلطة الحاكمة إلي انتخبها الشعب، بالعكس يلزمو يدافع عليها ويحميها كيما يقول القانون.

**الفصل 19.** الأمن الوطني هو أمن جمهوري يعني أمن في خدمة الشعب ويدافع عليه، مهمتو هي حماية الأمن العام وحماية الناس والمؤسسات وأملاكهم ومهمتو زادة تطبيق القانون إلي الناس الكل يلزم تحترموا.

لكن الأمن العام وقتلي يُقُوم بالمهام هاذي الكل يلزمو يَحْتَرَم حرية الناس ويلزم يكون محايد يعني ما يكون تابع لحتى جهة سياسية.

**الفصل 20.** الاتفاقيات إلي تَعْمَلها تونس مع الدول الأخرى وإلا مع منظمات دولية أخرى وإلي وافقت عليها السلطة التشريعية عندها قيمة أكبر من القانون يعني القانون ما يلزمش يخالفها لكن قيمتها أقل من الدستور يعني يلزمها تكون مطابقة للدستور.

## الباب الثاني. الحقوق والحريات

**الفصل 21.** التونسيين والتونسيات عندهم نفس الحقوق ونفس الواجبات.

وهوما متساويين قدام القانون من غير ما نَمَيِّزو واحد عَالِآخر يعني القانون يَنْطَبِق عليهم الكل كيف كيف.

الدولة تُضْمَنِلهم حقوقهم وحرياتهم الفردية يعني الحقوق والحريات إلي تهم كل شخص على رُوحو كيما حرية التَّنَقُّل والحريات العامة إلي تَتَمَارَس في إطار مجموعات كيما حرية الدَّخُول في حزب وإلا جمعية. والدولة زادة تُوفِّرلهم ظروف العيشة الكريمة يعني ما فيهاش دَلّ وَقْفَر وميزيرياً.

**الفصل 22.** الحق في الحياة حاجة مقدّسة ما نمسّوه كان في حالات خاصة برشة يحدّدها القانون يعني كان في الحالات لخطيرة ياسر إلي يتحدث فيها القانون على عقوبة الإعدام.

**الفصل 23.** تحمي الدولة كرامة الناس في نفسهم وبدنهم وتمنع التعذيب الجسدي والنفسي زادة. وإلي عذب ناس ما يلزمش يفلت مالعقاب مهما تعدّات السنين.

**الفصل 24.** الدولة تحمي الحياة الخاصة للناس يعني الحاجات إلي ما تُهمّمهم كان هوما وتحمي حرمة الديار إلي يُسكنو فيها وسريّة الجوابات وإلا المائلوات والرسائل إلي يبعثوها بالانترنات وإلا التليفون.

والدولة تحمي زادة كل المعلومات إلي تهّم ناس مُعيّنة وحكاياتهم الخاصة كيما وبين يُسكنو، معرّسين وإلا لا، مع شكون معرّسين، كيفاش يفكّرو، وقتاش يدخلو وإلا يخرجو ...

كل تونسي وإلا تونسية عندو حرية باش يختار وبين يُسكن وإلا وبين يمشي وعندو الحق باش يسافر لبرّة.

**الفصل 25.** ما نجّموش إنحيو الجنسية لأيّ تونسي وإلا نطرّدوه مالبلاذ وإلا نسلموه لدولة أخرى وإلا تمنعوه باش يروّح لتونس.

**الفصل 26.** الأجانب إلي هربو من بلدانهم على خاطر أفكارهم السياسية عندهم الحق باش يُطلبو من تونس باش تحميهم والقانون هو إلي يحدّد شروط الحماية هاذي إلي تسمّى لجوء سياسي.

والناس هانم ما نجّموش نسلموهم لبلدان أخرى.

**الفصل 27.** كل واحد متهم بجريمة بريء حتى يُحكّم عليه القاضي. والمحاكمة يلزم تكون تحترم حقوقو الكلّ وخاصة حقّو باش يدافع على روجو.

والحقوق هاذية نَحْتَرُمُها من وقت إِي تَوَقَّفَ حتى وقت إِي يُحْكَم عليه القاضي.

**الفصل 28.** العقوبة شخصية يعني كلّ واحد يَنْعاقب كان على فِعْلُو. وما يَنْعاقب إلا إذا كانت الْعَمَلَةُ إِي عَمَلُها يَمْنَعُها القانون من قَبْلُ. وما نَطْبُقُو عليه قانون الجديد إلا إذا كان القانون هاذا يَخَفِّف عليه العقوبة.

**الفصل 29.** حتّى حدّ ما يتوقّف وما يتشدّد في الحبس إلا إذا كان تشدّد وهو يعمل في جريمة وإلا وقتلي القاضي يقرّر توقيفو. وفي الحالات الزّور يلزمو يعرف حقوقو ويعرف علاش وقفوه وحبسوه وينجم وقتها يوكل محامي.

المدة إِي يتوقّف فيها من قبل ما يتحاكم يحددها القانون.

**الفصل 30.** كل شخص مربوط عندو الحق في معاملة إنسانية، نحترموا فيها كرامتو.

الدولة وقتلي تربط شخص في الحبس يلزمها تردّ بالها على مصلحة العايلة متاعو وتحاول تصلح المسجون باش يرجع للمجتمع في حالة أحسن.

**الفصل 31.** حرية الرأي والتفكير والتعبير والإعلام والنشر مضمونة يعني إتو كل واحد نُضْمَنُوهُ حقو باش يفكر كيما يحبّ ويقول إِي يحبّ ويكتب كيما يحبّ.

وحرية الإعلام مضمونة يعني إتو الجرايد والتلافز والراديووات يخدمو بكلّ حرية باش يوصلو المعلومة من غير ما يتدخل فيهم وفي خدمتهم حتى حدّ.

والحريات هاذي ما ينجم حتى حدّ يمنعها بالمسبق معناها الأخبار وإلا برنامج في التلفزة وإلا في الراديو وإلا كتاب وإلا مسرحية وإلا فيلم

وإلا جريدة، المفروض ما يمنعهم حدّ قبل ما يشوفوهم النَّاس وبلغّة  
أخرى ما يتصنّصروش وما يلعبش فيهم لمَقْصُ.

**الفصل 32.** الدولة تضمن الحق في الاعلام وفي الوصول للمعلومة  
يعني إنَّها تقوم بالحاجات اللازمة الكلّ باش تُوصل المعلومة للناس  
وإنو الناس هوما بيدهم ينجّمو يلوجو عالمعلومة ويثخصلو عليها.

وتحاول الدولة باش الناس الكل ينجّمو يستعمّلو التاليفون والإنترنات.

**الفصل 33.** الحريات الاكاديمية وحرية البحث العلمي مضمونة يعني  
إنو التدريس في الجامعة والبحث العلمي حتى واحد ما يتدخّل فيهم.

والدولة يلزم توقّر الإمكانيات اللازمة باش ينطوّر البحث العلمي  
والتكنولوجيا.

**الفصل 34.** الحق باش ننتخبو وإلا باش نترشحو في الإنتخابات  
مضمونين كيما يحددهم القانون.

وتعمل الدولة اللازم باش تضمن وجود النساء في المجالس إلي  
تتكوّن بالإنتخابات.

**الفصل 35.** حرية تكوين الأحزاب مضمونة يعني إنو كلّ مجموعة  
متاع عباد عندهم مبادئ واهداف مشتركة ويجبو يشاركو في الحكم  
ينجمو يعملو حزب.

حرية تكوين النقابات إلي تدافع على حقوق الخدّامة وإلا فئات معيّنة  
أخرى مضمونة.

حرية تكوين الجمعيات زادة مضمونة يعني إنو كل مجموعة عندها  
مبادئ وأهداف مشتركة وتحبّ تراقب السلطة وإلا تخدم المجتمع  
تتجمّ تعمل جمعية وإلا تنشط فيها.

هالأحزاب والنقابات والجمعيات يلزمهم يحترموا الدستور والقانون  
ويلزم حساباتهم المالية تكون واضحة وشفافة ويلزمهم يرفضو العنف

وهذا الكلّ موش كان في النّص القانوني إليّ ينظّمهم أما زادة في نشاطهم في الواقع.

**الفصل 36.** الحق النقابي بما في ذلك حق الاضراب مضمون يعني إنّو النقابات إليّ تُدافع عالخدّامة والموظفين بصفة عامة عندها الحق باش تدافع على مصالحهم المادية والمعنوية.

والحق النقابي هادا يدخل فيه حق الاضراب يعني الحق في القراف. الجيش ماعندوش الحق النقابي هادا.

الجيش والأمن والديوانة ماعندهمش حق يقرّفو.

**الفصل 37.** حرية الاجتماعات والمظاهرات مضمونة أما يلزمها الكلّ تكون سلمية يعني بلاش ضرب وتكسير واعتداء على الناس وإلّا على ممتلكاتهم.

**الفصل 38.** كل واحد عندو الحق في الصحة.

الدولة تضمن للتوانسة الوقاية بالمرض ويلزمها تتلّهي بصحة كل مواطن مريض وتوفّرلّو نوعية خدمات صحية باهية وما فيهنش خطر على صحتو.

والدولة تضمن زادة الدواء بلاش فلوس للقائلة وللتوانسة إليّ ما عندهم حتّى حدّ يُصرف عليهم.

وتضمن الدولة ترجيع المصاريف متاع المرض حسب الشروط إليّ يحددها القانون.

**الفصل 39.** يلزم الناس الكلّ تمشي للمكتب حتّى لعمرُ سَطّاش سنة على الأقلّ.

الدولة :

تضمن القراءة بلاش فلوس في المكاتب والمعاهد والجامعات العمومية يعني متاع الدولة. وتوفر الأزم باش تكون التربية والتعليم والتكوين بنوعية باهية.

تحاول زادة باش تربّي الجيل الجديد على الهوية العربية الإسلامية وإنتماؤو لتونس.

يلزمها تعودّ الجيل هذا على احترام واستعمال اللّغة العربية وعلى إئو يكون مِتَفَتِّحْ على اللّغات والحضارات الإنسانية الأخرى.

يلزمها تربّي الأجيال الكل على ثقافة حقوق الانسان.

**الفصل 40.** كل تونسي وتونسية عندو الحق باش يخدم. والدولة تعمل للأزم باش تضمن الحق هذا على أساس الكفاءة يعني إئها تقبل الإنسان في الخدمة اللّي تناسب تكوينو وإلّا قرابتو ومعرفتو وعلى أساس الإنصاف يعني بطريقة عادلة.

وكل تونسي وتونسية عندهم الحق باش يخدمو في ظروف باهية وبشهرية تناسب خدمتهم.

**الفصل 41.** حق الملكية مضمون.

حق الملكية ما يئمسّ كان في حالات يقول عليها القانون وإلي يعطي ضمانات لصاحب الملك.

الملكية الفكرية مضمونة يعني الغنايات والكُتُب والأفلام واللّوحات الفنية وغيرهم يحميها القانون ومايخلي حدّ يستعملها بلاش إذن مولاهم.

**الفصل 42.** الحق في الثقافة مضمون يعني الحق في المطالعة والرسم والمسرح والسينما والغناء والفنون بصورة عامة مضمون.

حرية الإبداع مضمونة والدولة تُشجّع الإبداع والخلق.

وتشجع زادة الثقافة التونسية سواء الثقافة التقليدية وإلا الجديدة والمتطورة باش نكونو مِتْسَامِحِين مع بعضنا يعني نَقْبَلُو بعضنا كيما أحنا وباش نُرْفَضُو العنْف ونُكُونُو مِتْفَتْحِين على الثقافات والحضارات إِلِي يَخْتَلِفُو معنا.

الدولة تحمي زادة التراث متاعنا وتِسْتَحْفِظُ عليه لأولادنا وبناتنا وأحفادنا.

**الفصل 43.** الدولة تشجع على الرياضة وتوفّر الإمكانيات باش الناس تعمل الرياضة وتِنْفَرُهد.

**الفصل 44.** الحق في الماء مضمون.

الدولة والناس زادة يلزمهم يِسْتَحْفِظُو على الماء ويستغلوه كيما يلزم بلاش تبذير.

**الفصل 45.** تضمن الدولة الحق في بيئة ما تضرّش بصحة الانسان وما تضرّش بالطبيعة ونُساهم باش يكون المناخ سليم. ويلزم الدولة توفّر كل ما يلزم باش تقضي على التلوّث البيئي يعني الوسخ إِلِي في الشوارع والمواد إِلِي تضرّ الماء والهواء والأرض كيما إِلِي يسيبها المعامل.

**الفصل 46.** الدولة ملزومة باش تحمي حقوق النساء إِلِي نُحْصَلُو عليهم من قُبَلْ وتعمل اللازم زادة باش إنْطَوْرها وإِحْسَنها.

الدولة تضمن للنساء والرجال نفس الفرص باش يَتَحَمَلُو المسؤوليات الكلّ مهما كبرت وفي المجالات الكلّ.

الدولة تعمل اللازم باش يكون عندنا قد النساء قد الرّجال في المجالس إِلِي ينتخبوها التوانسة.

الدولة تاخذ الاحتياطات اللازمة باش تقضي على العنف المادي والمعنوي ضد النساء.

**الفصل 47.** الصُّغار الكَلَّ عندهم حق على والديهم وعلى الدولة باش يُضْمَنُوْلَهُم كرامتهم وصحتهم واللَّهُوَة بيهم وتربيتهم وقرابتهم.

يلزم الدولة توقّر الحماية للصُّغار الكَلَّ مهما كانت وضِعَتَهُم وحسب المصلحة العليا متاع كل صغير، من غير ما تُمَيِّز بيناتهم.

**الفصل 48.** الدولة تحمي الناس إِيَّ عَندهم إعاقة من كل تمييز يعني تحميمهم من التفريق بينهم وبين لُخْرِين على أساس الإعاقة متاعهم.

كل مواطن عندو إعاقة عندو الحق باش يَسْتَنْفَعُ بِكَلِّ التسهيلات إِيَّ تُعاونو باش يعيش كيما الناس الكَلَّ حسب نوع إعاقتو والدولة يلزمها تاخذ الإجراءات اللازمة للشّي هَذَا.

**الفصل 49.** كل الحقوق الحريات إِيَّ ضَمْنُهَا الدستور هَذَا ينجّم القانون يحدّها من غير ما يقضي على الحرية نَفْسُهَا.

حدود الحريات هَذَايَا مَا تَنَحَّطُ كَانَ وَقَتْلِي تَوَلِّي لازمة :

في دولة مدنية ديمقراطية يعني بصفة عامة دولة تَحْتَرَمُ حقوق وحريات الناس الكَلَّ.

ويكون الهدف مالحود هَذَاي إما حماية حقوق ناس أُخْرِين وإلّا الأمان العام وإلّا باش تُدافع عالبلاذ وإلّا باش نحميو صَحَة العباد وإلّا الأخلاق إِيَّ متربّي عليها المجتمع.

والحدود هَذَاي يلزم تكون مُتَنَاسِبَة مع الظروف إِيَّ تُسَبِّبَتْ فِيهَا يعني ما تُنْجَمُش تكون الظروف خفيفة وموش خطيرة والحدود كبيرة مثلاً مَانْجُمُوش نَمْنَعُو حرية التعبير على خاطر ثَمَة ناس تَتَقَلَّقُ مالنقد وإلّا نَمْنَعُو مظاهره على خاطر ناس تَتَقَلَّقُ مالحسّ.

والمحاكم هي إِيَّ تُضْمِنُ الحقوق والحريات هَذَاي الكَلَّ وتحميها من كَلَّ من يتعدّي عليها.

حتى تعديل متاع دستور ما يلزمو بِنَقْصُ وَإِلَّا يَتَعَدَّى عَلَى حَقُوقِ  
الانسان وحریاتو یعنی حتی كي نَحْبُو نَبْدَلُو الدستور اَنْجَمُو نَزِيدُو فِي  
الحقوق والحریات أما ما اَنْجَمُوْش اَنْقُصُو مِنْهَا.

### الباب الثالث. السلطة التشريعية

**الفصل 50.** الشعب هو إلیّ يعمل القوانين إلیّ تُنظَّمُو مِنْ خِلالِ إِمَّا  
نوابو فِي مَجْلِسِ نوابِ الشَّعْبِ إلیّ اِنتخبهم وَإِلَّا مِنْ خِلالِ الإِسْتِفْتَاءِ  
یعني یوافق وَإِلَّا یرفض بِصِفَةِ مَبْأَسَةِ القانُونِ إلیّ سألوه علیه.

**الفصل 51.** مجلس نواب الشعب يكون مقرّو العادي هو تونس  
العاصمة أما يَنْجَمُ فِي ظُرُوفِ إِسْتِثْنَائِيَّةٍ كَيْمَا حَرْبٍ وَإِلَّا خَطَرُ كَبِيرٍ  
یهدّد البلاد یعمل جِلسات فِي أیِّ بِلادَةٍ أُخْرَى مَالِجُمْهُورِيَّةٍ.

**الفصل 52.** مجلس نواب الشعب عندو إستقلالية إدارية ومالية فِي  
میزانِيَّةِ الدَوْلَةِ. یعنی عندو حسابو وِحدو یَتَصَرَّفُ فِيهِ وَمَاهُو تَابِعٌ  
لِحتی وزارة وَإِلَّا إِدارة أُخْرَى.

المجلس یحطُّ وِحدو النِظامِ الداخلي متاعو یعنی القواعد إلیّ تُنظَّمُو  
وَتَحْكَمُ أَعْضائُو وَجِلساتُو. والقانون الداخلي هَذَا لَازِمٌ یصوِّتُو علیه  
أَكْثَرُ مِنْ نِصْفِ النوابِ عَالِأَقْلٍ.

الدولة التونسية لَازِمَهَا تَعْطِي لِلْمَجْلِسِ كُلِّ الوَسائِلِ المادية وَتوفِّرُو  
الموظِّفین وَالْعَمالَ إلیّ یَمْکُنُو النوابِ باش یُخْدَمُو مَلِیح.

**الفصل 53.** باش تُنَجِّمُ تترشح لمجلس نواب الشعب یلزمك :

تكون تونسي عندك عشر سنين عالأقل،

تكون عندك صفة الناخب،

تكون عمرك ثلاثة وعشرين سنة عالأقل نهارتْ تَقْدِیمِ تَرشِّحِكْ،

ما یكونش القانون الانتخابي یَحْرِمُكْ مَالِ تَرشِّحِ.

**الفصل 54.** باش تُنَجِّمُ تَنْتخبُ یلزمك :

تكون تونسي،  
يكون عمرك تُمنطاش سنة عالاًقل،  
تكون تتوفّر فيك الشروط إليّ حطّها القانون الإنتخابي.

## الفصل 55. إنتخابات مجلس نواب الشعب يلزمها تكون:

عامة : معناها التوانسة الكلّ يشاركو فيها من غير إقصاء على أساس الجهة إليّ جاو منها وإلّا على أساس مرا وإلّا راجل وإلّا على أساس مسلم وإلّا مش مسلم وإلّا على أساس يعرف وإلّا ما يعرفش يقرأ ...،

حرّة : معناها الناس تشارك فيها من غير ضغط وبكلّ حرية.  
مباشرة : يعني الناخب هو بنفسو إليّ يصوّت للمترشحين متاعو من غير وسيط.

سريّة : يعني يلزمو يُدخّل للخلوّة نهار التصويت باش ما يعرف حتى حدّ شكون إختار.

نزيهة : يعني المنافسة فيها بين المترشحين كانت شريفة ومن غير ممارسات غير قانونية للتأثير على الناخبين وتكون فيها الإدارة الإنتخابية ماهيش منازرة لحتى مترشح.

شفافة : يعني تكون قواعد الإنتخابات معروفة للعباد الكلّ وموجود ملاحظين مالجمعيات ويكون حساب النتائج قدامهم ومن غير تمكّميك وتلوعيب وزور.

وهالقواعد هادي الكلّ يحطّها القانون الإنتخابي.

القانون الإنتخابي يلزمو يعطي حق التوانسة في الخارج باش ينتخبو وباش يكون عندهم نواب يمثّلوهم في المجلس.

## الفصل 56. مجلس نواب الشعب ننتخبوه لمدة خمسة سنين نسمّيوها المدة النيابية. ويتمّ إنتخاب مجلس جديد في إخر شهرين مالمدة هادي. وإذا كان ثمة خطر كبير يهدّد البلاد ينجم يتمّ التمديد في المدة هادي بقانون.

**الفصل 57.** الدَّورَةُ النِّيابِيَّةُ العاديَّةُ متاع المجلس تَبْدَى في أكتوبر وتُوفَى في جويلية من كلِّ عام. الدَّورَةُ الأولى بعد الانتخابات التشريعية تَبْدَى بعد خُمسِطاش يوم ما لإعلان على النتائج النهائيَّة ورئيس المجلس القديم هو إلي يَسْتَدْعِي النواب للإجتماع.

المجلس يَنْجَم يعقد دَوْرَة استثنائية إذا كان بدأت المدة النيابية الأولى في العطلة التشريعية يعني بين أوت وسبتمبر. وتتواصل الدَّورَة الإستثنائية هاذي حتى لين تَبْدَأ الحكومة خدمتها.

كيما يَنْجَم رئيس الجمهورية وإلَّا رئيس الحكومة وإلَّا ثلث أعضاء المجلس يَسْتَدْعِيُو المجلس للإنعقاد في دَوْرَة استثنائية باش ينظر في مسائل محدَّدة.

**الفصل 58.** كل نائب مالنواب إلي نجحو في الانتخابات لازمو يحلف: "أقسم بالله العظيم أن أخدم الوطن بإخلاص، وأن ألتزم بأحكام الدستور وبالولاء التام لتونس".

**الفصل 59.** من أول جلسة للمجلس الجديد يلزم النواب ينتخبو رئيس مجلس من بيناتهم.

المجلس يلزمو يكوّن لجان قارّة يعني دائمة ولجان خاصّة يعني لاهية بمسائل معيّنة تتكوّن من نواب. تركيبة ووظيفة النواب في اللجان هاذي تتوزّع على حسب عدد البلايص إلي تُحصَلت عليها كل كتلة في المجلس. (مثال إلي عندو ثلاثين في الميّا مالبلايص باش يكون عندو ثلاثين بالمّيّا من عدد النواب ومسؤوليات أهم وأكثر في اللّجنة مَلّي عندو عشرين في الميّا).

يَنْجَم المجلس يكوّن لجان تحقيق يعني تبحث وتسنقّر في بعض المشاكل، وفي الحالة هاذي يلزم كل السلطات والإدارات تتعاون مع اللجان هاذي.

**الفصل 60.** المعارضة (يعني الأطراف إلي ماهيش مُمثلة في الحكومة) مهمّة برشافي المجلس.

المعارضة عندها حقوق تُعاونها باش وجودها في المجلس ما يكونش فارغ، وباش تنجم تقوم بمهمتها :

يلزم تكون ممثلة في كل هياكل المجلس (اللجان، مكتب المجلس...)

يلزم تكون موجودة في كل أنشطة المجلس في الداخل والخارج من غير ما نُقصيها،

رئيس لجنة المالية ومقرّر لجنة العلاقات الخارجية مع الدول الأجنبية يلزمهم يكونوا نواب بالمعارضة،  
من حق المعارضة إنْها تُكوّن لجنة تحقيق كل عام ويرأسها نائب منها،

ويلزمها تُشارك في العمل النيابي بصفة إيجابية.

**الفصل 61.** كل نائب في المجلس يصوّت على القوانين وقرارات المجلس بنفْسُو وما ينجّمش يوكل حدّ آخر باش يصوّت في بلاصتو.

**الفصل 62.** شكون ينجّم يقوم بالمبادرة التشريعية يعني شكون عندو الحق يقدم مقترحات وإلا مشاريع قوانين جديدة :

إما عشرة نواب عالأقل ووقتها نسميُوهم مقترحات قوانين،  
إما رئيس الجمهورية وإلا رئيس الحكومة ووقتها نسميُوهم مشاريع القوانين،

مشاريع القوانين الجديدة إلي تهم الموافقة على معاهدات دولية وإلا إلي تهم مشاريع قوانين المالية ما ينجّم يقمها كان رئيس الحكومة.

المجلس يلزمو يُنظر في مشاريع القوانين إلي يقمها رئيس الجمهورية وإلا رئيس الحكومة قبل ما يُنظر في مقترحات القوانين إلي يقمها النواب.

**الفصل 63.** النواب ما ينجّموش يقممو مقترحات تبديل قوانين وإلا مقترحات قوانين جديدة تمسّ الميزانية إلي تُعدّات في قانون المالية.

يعني ما يلزمش تزيد في مصروف الدولة من غير ما تزيد في مدخلها.

**الفصل 64.** المجلس يلزمو يصادق على مشاريع القوانين الأساسية بالأغلبية المطلقة لأعضائو الكلّ يعني بأكثر من نصف نواب المجلس الكلّ الحاضرين منهم والغائبين.

المجلس يصادق على مشاريع القوانين العادية بأغلبية الأعضاء إليّ حاضرين في الجلسة وهالأغلبية ما يلزمش تكون أقل من ثلث أعضاء المجلس الكلّ.

مشاريع القوانين الأساسية ما تتجّم تتعدّى للنقاش في جلسة عامّة للنواب كان بعد خمسطاش يوم مليّ تُعدّات على اللجنة المختصة.

**الفصل 65.** القوانين تتجّم تكون إمّا قوانين عادية وإلّا قوانين أساسية، القوانين العادية هي إليّ :

- تحطّ أنواع المؤسسات والمنشآت العمومية وكيفاش تتباع،
- تهّم الجنسيّة،
- تهّم الالتزامات المدنية والتجارية، يعني الكنراتوات والشركات الخاصة ...،
- تهّم الإجراءات متاع المحاكم،
- تحدّد الجنايات يعني الجرائم الكبيرة والجنح والعقوبات والمخالفات إليّ العقوبة متاعها هي الحبس،
- تحطّ الطريقة إليّ تتحسب بيها الأداءات ونسبئها وأنواعها وكيفاش تجمعها الدولة،
- تحطّ نظام العُملة متاع البلاد،
- تهّم القروض متاع الدولة،
- تحدّد الوظائف الكبيرة في الدولة،
- تحدّد كيفاش يتمّ التصريح بمكاسب المسؤولين الكبار في البلاد،
- تعطي الضمانات المهمة للموظفين والعسكريين،

- تنظّم كيفاش إِتَمّ المصادقة على المعاهدات،
- تهَمّ قوانين المالية والميزانية والمصادقة على مخطّطات التنمية،
- تحطّ المبادئ الأساسية لنظام الأملاك والتعليم والبحث العلمي والثقافة والصحة العمومية والبيئة والتهيئة الترابية والعمرانية والطاقة وقانون الشغل والضمان الاجتماعي.
- أما القوانين الأساسية يعني إليّ تهَمّ مسائل مهمّة وحساسة تتعلّق بـ :
  - الموافقة على المعاهدات الدولية،
  - تنظيم العدالة والقضاء،
  - تنظيم الإعلام والصحافة والنشر،
  - تنظيم الأحزاب والنقابات والجمعيات والمنظمات والهيئات المهنية وتمويلها،
  - الجيش الوطني،
  - تنظيم قوات الأمن الداخلي والديوانة،
  - القانون الانتخابي،
  - التمديد في مدة مجلس نواب الشعب حسب الفصل 56 في حالة الخطر الكبير على البلاد،
  - التمديد في المدة الرئاسية حسب الفصل 75 في حالة الخطر الكبير على البلاد،
  - الحريات وحقوق الإنسان،
  - الأحوال الشخصية، يعني المسائل إليّ تهَمّ العرس والطلاق والورث ...،
  - تحطّ الواجبات الأساسية للمواطنة، كيما الخدمة العسكرية،
  - السلطة المحلية، يعني التقسيم الإداري للبلاد كيما البلديات والجهات والأقاليم،
  - تنظيم الهيئات الدستورية، يعني الهيئات إليّ حطّهم الدستور كيما هيئة الإنتخابات ...،
  - القانون الأساسي للميزانية متاع الدولة.

المجالات إلی موش في القائمة هاذي تُدخَل في صلاحيات رئيس الحكومة إلی عندو السلطة الترتيبية العامة، يعني يصدر الأوامر إلی تنفّذ القوانين، والأوامر إلی تحطّ قواعد جديدة في غير المجالات متاع القانون.

**الفصل 66.** المداخل متاع الدولة ومصاريفها إتمّ الموافقة عليها حسب الشروط إلی يحطّها القانون الأساسي للميزانية.

كل عام مجلس نواب الشعب يلزمو هو إلی يوافق على مشاريع قوانين المالية وتسكير ميزانية البلاد مع إحترام الشروط إلی حطّها القانون الأساسي للميزانية.

الحكومة عندها حتى لنهارت 15 أكتوبر من كل عام باش نُقدّم مشروع قانون المالية إلی حَضْرَتُو لمجلس نواب الشعب.

المجلس عندو حتى لنهارت 10 ديسمبر باش يوافق على المشروع هاذا. ومن بعد يبتعث لرئيس الجمهورية باش يصحّ عليه.

رئيس الجمهورية عندو نهارين في يدو باش يعترض على مشروع القانون ويرجعو للمجلس باش يتناقش مرّة أخرى.

إذا كان رجّع مشروع قانون المالية يلزم المجلس يجتمع في ظرف ثلاثة أيام ويتناقش فيه مرّة أخرى.

إذا كان المجلس تناقش في مشروع قانون المالية ووافق عليه مرّة أخرى يبعثو لرئيس الجمهورية.

في حالة الموافقة الثانية على مشروع قانون المالية وإلا في حالة إتو الرئيس فوّت أجل النهارين باش يرجّع فيهم المشروع للمجلس ينجم الرئيس وإلا مجلس نواب الشعب في ظرف ثلاثة أيام يطلبو المحكمة الدستورية باش تراقب إذا كان المشروع متاع قانون المالية مطابق للدستور وإلا لا.

المحكمة الدستورية عندها خمسة أيام باش تقول إذا كان مشروع قانون المالية دستوري وإلا موش دستوري.

إذا كان قالت إيلي ماهوش دستوري وقتها يعاود مجلس نواب الشعب يتناقش في مشروع القانون على حسب قرار المحكمة الدستورية.

إذا كان قالت راهو المشروع دستوري وإلا وقتلي تم الموافقة عليه مرة أخرى وإلا وقتلي ما رجعت المشروع للمجلس، وقتها رئيس الجمهورية عندو نهارين باش يختمو وبعد ينشرو في الرائد الرسمي. مهما كانت الحالة وإلا الوضعية يلزم مشروع قانون المالية يتم ختمو قبل نهار 31 ديسمبر من كل عام.

إذا كان ما تمش ختم مشروع قانون المالية قبل 31 ديسمبر وباش ما تاقش البلاد وتتعلّ مصالح الموظفين والمتعاقدين مع الدولة يتم الموافقة على مصاريف الدولة على أقساط بأمر رئاسي يتجدد كل ثلاثة شهر وتعد الدولة تقبض في المداخل متاعها كيما يقول القانون.

**الفصل 67.** تتعرض على مجلس نواب الشعب باش يوافق عليها، المعاهدات الدولية إيلي تهم التجارة، وإلا المنظمات الدولية وإلا حدود الدولة، وإلا القروض متاعها، وإلا وضعية الأشخاص يعني مثلا المعاهدات إيلي تهم حقوق الإنسان وإلا مثلا إقامة التوانسة في الخارج وإلا إقامة أجنب في تونس وإلا إتفاقيات فيها مسائل تدخل في مجالات القوانين المذكورة في الفصل 65.

المعاهدات ما تولي نافذة في تونس يعني ما تولي تطبق في تونس كان ما يوافق عليها رئيس الجمهورية.

**الفصل 68.** ما يمكنش نتبعو النائب في مجلس نواب الشعب قدام المحاكم وإلا نوقفوه على خاطر أعمال قام بيهم في إطار مهمتو كنائب يعني المهام إيلي عطاها الدستور والقانون. وهادي تنسمى الحصانة البرلمانية وإلا النيابة.

**الفصل 69.** إذا شدّ صحيح النائب في حصانته الجزائية بطلب كتابي ما يمكنش تتبَعو قَدَام المحاكم الجزائية يعني من أجل تهمة بجريمة كان ما تتَرَفَع عليه الحصانة بالمجلس.

إذا كان تشدّ النائب في حالة تلبّس بالجريمة يعني وهو يقوم بجريمة وقتها ينجم القاضي يُوقفو ويعلم رئيس مجلس نواب الشعب. وإذا كان مكتب المجلس طلب باش يتمّ إطلاق سراحو يلزم يتسيّب.

**الفصل 70.** وقت يتمّ حلّ مجلس نواب الشعب، رئيس الجمهورية بعد ما يتشاور مع رئيس الحكومة ينجم يصدر مراسيم باش ينظم المجالات إلي تهّم القوانين الأساسية والعادية المذكورة في الفصل 65. المراسيم هاذي يلزمها تتعدّي لمجلس نواب الشعب الجديد باش يوافق عليها.

ثلاث أخماس يعني ستين في الميا من أعضاء مجلس نواب الشعب ينجمو يعطيو توكيل لرئيس الحكومة باش يصدر مراسيم تنظّم المجالات إلي تهّم القوانين الأساسية والعادية المذكورة في الفصل 65. التوكيل هاذا يلزم يحدّد المجال متاع المراسيم هاذي وما يلزمش يفوت الشهرين. بعد الشهرين هاذم يلزم المراسيم إلي خذاهم رئيس الحكومة تتعدّي لموافقة مجلس نواب الشعب. في كل الأحوال النظام الإنتخابي ما ينجمش يصدر في مرسوم.

## **الباب الرابع. السلطة التنفيذية**

**الفصل 71.** السلطة التنفيذية يعني سلطة تطبيق القوانين وتسيير الدولة، يتعاونو عليها رئيس الجمهورية ورئيس الحكومة.

## **القسم الأول. رئيس الجمهورية**

**الفصل 72.** رئيس الجمهورية هو رئيس الدولة وهو إلي يمثل وحدتها.

الرئيس من دورو إئو يضمن إستقلال الدولة يعني يضمن باش ماتخضعش لحتى سلطة خارجية.

الرئيس من دورو زادة إئو يضمن إستمرارية الدولة يعني يحرص باش الدولة ما تتفككش ومؤسساتها ما تاقفش.

أهم دور للرئيس هو ضمان إحترام الدستور إئى هو أعلى قانون في البلاد.

**الفصل 73.** مقرّ رئاسة الجمهورية هو تونس العاصمة أما ينجم يتبدل لأي بلاصة أخرى مالجمهورية في ظروف إستثنائية كيما الحرب والخطر الكبير إئى يهدد البلاد.

**الفصل 74.** إئى باش يترشح لرئاسة الجمهورية لازم تتوفر فيه الشروط هادي :

يكون تونسي وإلا تونسية ملى تولد،

يكون عندو الحق باش ينتخب،

يكون مسلم وإلا مسلمة،

يكون عمرو خمسة وثلاثين سنة عالأقل،

بالنسبة للتوانسة إئى عندهم جنسية أخرى يلزم المترشح يُوعد باش يتخلى على الجنسية الثانية كان يريح الإنتخابات الرئاسية،

يكون عدد مانواب في مجلس نواب الشعب وإلا رؤساء مجالس البلديات وإلا الجهات وإلا الأقاليم المنتخبين وإلا عدد ماناخبين مساندين ترشحو يعني مصحئلو بلش يترشح. والمساندة هادي ينظّمها القانون الانتخابي.

**الفصل 75.** ننتخبو رئيس الجمهورية لمدة خمسة سنين. وتصير الإنتخابات الجديدة في الشهرين الإخرانين مالمدة الرئاسية.

الإنتخابات الرئاسية يلزمها تكون :

عامة : معناها التوانسة الكلّ يشاركو فيها من غير إقصاء على أساس الجهة إليّ جاو منها وإلّا على أساس مرا وإلّا راجل وإلّا على أساس مسلم وإلّا مش مسلم وإلّا على أساس يعرف وإلّا ما يعرفش يفرا ...،

حرّة: معناها الناس تشارك فيها من غير ضغط وبكلّ حرية. مباشرة: يعني الناخب هو بنفسو إليّ يصوّت للمترشحين متاعو من غير وسيط.

سريّة: يعني يلزمو يُدخل للخلوة نهار التصويت باش ما يعرف حتى حدّ شكون إختار.

نزيهة: يعني المنافسة فيها بين المترشحين كانت شريفة ومن غير ممارسات غير قانونية للتأثير على الناخبين وتكون فيها الإدارة الانتخابية ماهيش منحازة لحتى مترشح.

شفافة: يعني تكون قواعد الانتخابات معروفة للعباد الكلّ وموجود ملاحظين بالجمعيات ويكون حساب النتائج قدامهم ومن غير تمكّميك وتلوعيب وزور.

باش يربح واحد بالمترشحين المضرّبة الأولى يلزمو ينتخبوه أكثر من نصف التوانسة إليّ مشاو صوّتو.

إذا كان حتى واحد بالمترشحين ما تحصّل بالأغلبية هادي وقتها تصير دورة ثانية بين المترشحين الزوز إليّ جابو أكثر أصوات في الدورة الأولى، في ظرف جمعيتين مليّ تتعطى النتائج.

إذا كان واحد بالمترشحين توفّى في الدورة الأولى وإلّا الثانية، وقتها نعاودو نحلّو باب الترّشحات مرّة أخرى ونحطّو تواريخ جديدة للإنتخابات في ظرف خمسة وأربعين يوم. والإجراءات هادي ما يتطبّقش وقتليّ واحد بالمترشحين إنسحب في الدورة الأولى وإلّا الثانية.

إذا كان ما يمكنش تنظيم إنتخابات رئاسية في وقتها بسبب خطر كبير عالبلاد، مجلس نواب الشعب يلزمو يعمل قانون باش يطوّل في المدة الرئاسية.

ما ينجم حتى حدّ يكون رئيس جمهورية لأكثر من مرتين وراء بعضهم ولا حتى بعاد على بعضهم.

أما إذا كان الرئيس إستقال قبل ما توفى المدة الرئاسية متاعو نحسبو كايّنو عدّى المدة الكلّ.

ما نجموش نبذلو الدستور باش تولّي عدد الدورات الرئاسية أكثر من إثنين وإلا باش تولّي مدة الدورة الرئاسية أكثر من خمسة سنين.

**الفصل 76.** كي يتمّ إنتخاب رئيس جمهورية جديد يلزمو يحلف قدام مجلس نواب الشعب القسم هادا : "أقسم بالله العظيم أن أحافظ على استقلال تونس وسلامة ترابها، وأن أحترم دستورها وتشريعها، وأن أرفع مصالحها، وأن ألتزم بالولاء لها".

رئيس الجمهورية بعد ما يتمّ إنتخابو ما ينجمش يكون عنذو أي مسؤولية في أي حزب سياسي يعني يلزمو يستقيل من رئاسة حزبو وإلا أي مسؤولية أخرى فيه.

**الفصل 77.** رئيس الجمهورية :

- يمثل الدولة،
- يحدّد سياسة الدفاع عالبلاد والسياسة الخارجية والأمن القومي إليّ يهمّ حماية البلاد مالتهديدات الداخلية والخارجية بعد ما يتشاور مع رئيس الحكومة،
- يحلّ مجلس نواب الشعب في الحالات إليّ يسمحو بيهم الدستور. أما ماينجمش يحلّ المجلس في الستة الشهر الأولانين ملى بدأت الحكومة تخدم بعد إنتخابات تشريعية وإلا في الستة الشهر الإخرانين المدة الرئاسية وإلا المدة النيابية،

- يترأس مجلس الأمن القومي ويستدعى فيه رئيس الحكومة ورئيس مجلس نواب الشعب،
- هو القائد الأعلى للقوات المسلحة،
- يعلن الحرب ويتفق عالسلم بعد موافقة ستين في الميا من أعضاء مجلس نواب الشعب،
- يقرّر باش يبعث قوات للخارج بعد ما يتشاور مع رئيس الحكومة ورئيس مجلس نواب الشعب وفي ظرف شهرين يلزم مجلس النواب يوافق،
- ياخذ التدابير والقرارات والإجراءات اللازمة في الظروف الإستثنائية إلي يحكي عليها الفصل 80،
- يصحح على المعاهدات الدولية وينشرها في الرائد الرسمي،
- يعطي الأوسمة ويعلق النواشن،
- يقرّر العفو الخاص على المرابط.

## الفصل 78. يصدر رئيس الجمهورية أوامر باش:

- يعين مفتي الجمهورية وينحيه،
- يعين وينحى في المناصب الكبيرة في رئاسة الجمهورية والمؤسسات إلي تابعينها كيما معهد الدراسات الإستراتيجية،
- يعين وينحى في المناصب الكبيرة في الجيش والخارجية والأمن بعد ما يتشاور مع رئيس الحكومة،
- يعين محافظ البنك المركزي إلي يقترح إسمو رئيس الحكومة ويوافق عليه أكثر من نصف أعضاء مجلس نواب الشعب،
- وباش ينجم ينحيه من منصبو لازم تلت النواب يطلبو إعفانو ويوافق على هاذا أكثر من نصف أعضاء المجلس.

**الفصل 79.** رئيس الجمهورية ينجم يخاطب مجلس نواب الشعب يعني ينجم يخطب قدامو وإلا يبعثلو خطاب مكتوب في أي مسألة تهم البلاد.

**الفصل 80.** وقتلّي يكون ثمة خطر كبير يهدّد البلاد كيما حرب وإلّا حالة فوضى وإضطرابات كبيرة داخل البلاد تمسّ من السير العادي للدولة، ينجم رئيس الجمهورية ياخذ إليّ يلزم من تدابير وإجراءات باش إتمّ مواجهة الوضعية الإستثنائية هادي.

التدابير هادي لازمو يتشاور فيها مع رئيس الحكومة ورئيس مجلس نواب الشعب ويعلم بيهم رئيس المحكمة الدستورية، ومن بعد يلزم يخرّج التدابير هاذم في بيان يعلم فيه الشعب.

الهدف مالتدابير هادي هو رجوع الحالة العادية والسير العادي للدولة في أقرب وقت.

في الفترة الإستثنائية هادي مجلس نواب الشعب يقعد في حالة إنعقاد يعني النواب ما ينجموش يخرجو في عطلة، والرئيس ماعندوش الحق يقرّر باش يحلّ المجلس، وفي نفس الوقت النواب ما عندهمش الحق يقدمو لائحة لؤم باش يطيحو الحكومة.

بعد شهر من إعلان الحالة الإستثنائية وفي أيّ وقت آخر بعد الشهر، رئيس مجلس نواب الشعب وإلّا ثلاثين نائب ينجمو يطلبو مالمحكمة الدستورية باش تقرّر إذا كان لازم تبقى الحالة الإستثنائية هادي وإلّا لا.

المحكمة الدستورية تاخو قرارها وتعلن عليه في ظرف خمسطاش يوم.

إذا كان وفات الأسباب متاع الحالة الإستثنائية يعني مثلا وفات الحرب وإلّا حالة الإضطرابات، وقتها يوفى العمل بالتدابير إليّ خذاها رئيس الجمهورية إليّ يلزمو يصدر بيان للشعب باش يعلمو بهذا.

**الفصل 81.** رئيس الجمهورية هو إليّ يختم القوانين يعني يصحّح عليها بعد ماتجيه من مجلس نواب الشعب وهو إليّ يعطي الإذن بش تتنشر في الرائد الرسمي للجمهورية التونسية.

رئيس الجمهورية يلزمه يصحّ القوانين في ظرف أربعة أيام من:

1. نهارتُ إليّ وفي أجل بعث المشروع للمحكمة الدستورية باش تراقب دستوريته وإلاّ وفي الأجل إليّ ينجم فيه رئيس الجمهورية يرجع المشروع للمجلس على خاطر موش موافق عليه،

2. نهارتُ إليّ فات أجل ترجيع مشروع قانون حكمت المحكمة بدستوريته وإلاّ كي يرجع المشروع لرئيس الجمهورية بالمحكمة الدستورية وقتليّ يفوتو خمسة وأربعين يوم من غير ما تنظر في الدستورية متاعو كيما يقول الفصل 121.

3. نهارتُ إليّ يوفى أجل الطعن في دستورية مشروع قانون قلم مجلس النواب بتغيير بعض فصولو بعد ما رجّعوهو لرئيس الجمهورية.

4. نهارتُ إليّ وافق مجلس نواب الشعب مرّة ثانية على مشروع قانون من غير ما بدّل فيه حتى فصل رغم إنّو رئيس الجمهورية رجّعو للمجلس وتكون المحكمة الدستورية قالت إنّو دستوري بعد الموافقة الأولى وإلاّ وقتليّ يفوتو خمسة وأربعين يوم من غير ما تنظر في الدستورية متاعو كيما يقول الفصل 121.

5. نهارتُ صدور قرار المحكمة الدستورية وإلاّ وقتليّ يفوتو خمسة وأربعين يوم من غير ما تنظر في الدستورية متاعو كيما يقول الفصل 121 لو كان الرئيس قام بترجيع المشروع والمجلس وافق على المشروع بعد ما غير فيه بعض الفصول.

من ناحية أخرى، رئيس الجمهورية ينجم يرجع أيّ مشروع قانون أساسي وإلاّ عادي لمجلس نواب الشعب باش يتناقش فيه مرة أخرى وكي يرجع المشروع يلزمه يفسّر الأسباب.

ترجيع مشاريع القوانين للمجلس يلزمو يكون في ظرف خمسة أيام من:

1. نهارتُ إليّ تعدّاو سبعة أيّام من غير ما يطعن في دستورية المشروع لا رئيس الجمهورية ولا رئيس الحكومة ولا ثلاثين نائب،

2. نهارتُ صدور قرار المحكمة الدستورية يقول إنّو المشروع ما يخالفش الدستور وإلاّ من وقتليّ يفوتو خمسة وأربعين يوم من غير ما تنظر في الدستورية.

وكيف يرجع مشروع القانون للمجلس تكون الموافقة بأكثر من نصف النواب بالنسبة للقوانين العادية وبثلاثة أحماس يعني بستين في المياّ مالنواب عالأقل بالنسبة للقوانين الأساسية.

**الفصل 82.** رئيس الجمهورية ينجم إستثنائيا يعرض على الإستفتاء الشعبي، يعني يطلب مالشعب إنّو يقول موافق وإلاّ موش موافق على مشروع قانون صادق عليه مجلس نواب الشعب ويكون القانون هاذا متعلّق إما بموافقة على إتفاقية دولية وإلاّ متعلّق بالحقوق والحريات وإلاّ بالأحوال الشخصية. وفي الحالة هاذي، رئيس الجمهورية ما عاّش عندو الحق إنّو يرجع القانون للمجلس للمداولة الثانية.

وإذا كان الشعب وافق بالأغلبية على مشروع القانون، وقتها رئيس الجمهورية يلزمو يصحّح عالقانون هاذا ويعطي الإذن باش يتنشر في الرائد الرسمي في ظرف عشرة أيام من نهارتُ النتيجة متاع الإستفتاء.

القانون الإنتخابي هو إليّ يحدّد كيفاش يتمّ الإستفتاء وكيفاش نُعلنو عالنتايح متاعو.

**الفصل 83.** إذا كان رئيس الجمهورية ما ينجمش يقوم بمهامو بصفة وقتية، ينجم يوكل رئيس الحكومة في بلاصتو لمدة ما تفوتش شهر تتجدّد مرّة وحدة. يعني التوكيل لرئيس الحكومة ما يفوتش شهرين.

يلزم إعلام رئيس مجلس نواب الشعب بالتوكيل هذا.

**الفصل 84.** إذا كان رئيس الجمهورية ما ينجّمش يقوم بمهامو بصفة وقتية ومانجّمش يوگّل رئيس الحكومة، بالوقت تجتمع المحكمة الدستورية وتقول إنّو ثمة شغور وقتي يعني فراغ وقتي في منصب الرئيس.

بعد هذا، يوّلّي رئيس الحكومة قائم بأعمال الرئاسة ويعوّض الرئيس لمدة ما تفتوتش الشهرين.

إذا كان فاتو الشهرين وإلّا توفّي رئيس الجمهورية وإلّا قدّم إستقالتو وإلّا ولى في حالة عجز تام وإلّا لأي سبب آخر:

تجتمع بالوقت المحكمة الدستورية وتقول إنّو ثمة شغور نهائي في منصب رئاسة الجمهورية.

وتعلم رئيس مجلس نواب الشعب، إلّي يعوّض بالوقت رئيس الجمهورية في مهامو لمدة بين خمسة وأربعين وتسعين يوم، باش يتمّ إنتخاب رئيس جديد.

**الفصل 85.** في حالة الشغور النهائي لمنصب رئاسة الجمهورية، رئيس مجلس نواب الشعب يلزم يحلف القسم الدستورية إمّا قدّام مجلس نواب الشعب وكي ماينجّمش وقتها يلزمو يحلف قدّام مكتب المجلس. وإذا كان وقع حلّ المجلس، يحلف قدّام المحكمة الدستورية.

**الفصل 86.** في حالة الشغور الوقتي وإلّا النهائي، القائم بأعمال الرئاسة ما عندوش الحق يقّدّم مقترحات باش يبدّل الدستور وإلّا يعمل إستفتاء وإلّا يحلّ مجلس نواب الشعب.

في المدة الرئاسية الوقتية يعني وقت يكون رئيس مجلس نواب الشعب هو إلّي قائم بأعمال الرئاسة يلزم يتمّ إنتخاب رئيس جديد لمدة كاملة يعني خمسة سنين، ومجلس نواب الشعب ما عندوش الحق يقّدّم لائحة لوم ضدّ الحكومة باش يطّيحها.

**الفصل 87.** في المدة الرئاسية يتمتع الرئيس بحصانة وهي نوع بالحماية تخليه ما ينجّمش يتعدّى قدام محكمة وإلا يتمّ تتبّعوا قضائياً. ما نتبّعواش قدام القضاء وقتلي هو رئيس أما كي يولي ما عاوش رئيس إتجمو نرجعو إنتبّعوا مهمما كانت الأعوام إلي عداها في الحكم. وفي كل الحالات ما يُمكنش تتبّع رئيس الجمهورية على أعمال قام بيها في إطار مهمّو الرئاسية والمقصود هوني هي الأعمال إلي قام بيها في إطار ممارسة المهام إلي عطاهاو الدستور والقانون موش الأعمال الشخصية متاعو.

**الفصل 88.** أغلبية أعضاء مجلس نواب الشعب ينجّمو يقدمو لائحة ضد رئيس الجمهورية باش ينحّيوه. سبب اللائحة هادي إنو الرئيس قام بخرق كبير للدستور يعني إعتداء كبير عليه.

باش تتعدّى اللائحة هادي يلزم يوافقو عليها ثلثين من أعضاء المجلس الكلّ يعني أكثر من سنة وستين بالميا من النواب. بعد ما يتمّ التصويت على اللائحة إلي باش تنحّي الرئيس تتعدّى للمحكمة الدستورية إلي تُقرّر بأغلبية الثلثين من أعضاءها. إذا كان المحكمة الدستورية شافت إنو رئيس الجمهورية قام بخرق كبير للدستور يلزمها تحكم بعزلو يعني تنحّيتو من منصبو. إذا كان تمّ عزل الرئيس إنجمو بعدها نقومو بتتبّعات جزائية ضدّو يعني يتعدّى قدام القضاء ويتحاسب عالعمائل إلي تعدّى بيها عالدستور.

الرئيس إلي تمّ عزلو ماعاوش ينجّم يترشح لحتّي إنتخابات أخرى.

### القسم الثاني. الحكومة

**الفصل 89.** الحكومة تتكوّن من رئيس الحكومة ووزرّة وكتّاب دولة.

الوزرة وكتّاب الدولة، رئيس الحكومة يختارهم وحدو إلا وزير الخارجية ووزير الدفاع، إلي يختارهم بعد ما يشاور رئيس الجمهورية.

في ظرف جمعة من إعلان نتيجة الإنتخابات البرلمانية، يلزم رئيس الجمهورية يطلب من مرشح الحزب وإلا الإئتلاف الإنتخابي إلي جاب أكثر بلايص في مجلس نواب الشعب، إنو يكوّن حكومة.

وإذا كان ثمة زوز أحزاب عندهم بلايص قدّ قدّ، وقتها رئيس الجمهورية يطلب من مرشح الحزب إلي عندو أكثر أصوات في الإنتخابات إنو يكوّن حكومة.

رئيس الحكومة إلي كلفو الرئيس يلزمو يكوّن حكومتو في ظرف شهر وكان ما نجمش نزيده شهر آخر.

كان فاتو الشهرين ورئيس الحكومة ما نجمش يكوّن حكومتو وإلا ما نجمش ياخذ ثقة مجلس نواب الشعب، وقتها رئيس الجمهورية عندو عشرة أيام في يدو باش يتشاور مع الأحزاب ومجموعات النواب ويختار الشخص الأقدر ويكلفو باش يكوّن حكومة في ظرف شهر.

كان يفوتو أربعة شهر من غير ما ينجم لا مرشح الحزب الراح ولا الشخص إلي إختارو رئيس الجمهورية إنو يكوّن حكومة وإلا يتحصّل على ثقة مجلس نواب الشعب، وقتها يولي من حق رئيس الجمهورية إنو يحلّ مجلس نواب الشعب باش تصير إنتخابات تشريعية جديدة وإلي يلزمها تصير بعد خمسة وأربعين يوم عالأقل وما تفوتش تسعين يوم.

باش تنجم الحكومة تاخذ ثقة مجلس نواب الشعب يلزم تعرض برنامجها قدامو ويلزم يصوتولها أكثر من نصف نواب المجلس.

وقتلّي ناخو الحكومة الثقة، رئيس الجمهورية يلزمو يسمّي رئيس الحكومة والوزرة وكتّاب الدولة. وبعد ما يسمّيهم يلزمهم يحلفو قدامو القسم هذا : " أقسم بالله العظيم أن أعمل بإخلاص لخير تونس وأن

أحترم دستورها وتشريعها وأن أرفع مصالحها وأن ألتزم بالولاء لها".

**الفصل 90.** النائب في مجلس نواب الشعب إليّ تُسمّى في الحكومة، يلزمو يستقيل من المجلس.

القانون الانتخابي هو إليّ يحدّد كيفاش يتمّ تعويضو.

لا رئيس الحكومة ولا بقية الوزرة وكتّاب الدولة ما ينجم يكون عندهم أيّ خدمة وإلاّ وظيفة أخرى وقتلي يكونو في المناصب هاذي.

**الفصل 91.** رئيس الحكومة هو إليّ يحطّ السياسة العامة متاع الدولة وينفّذها من غير ما يتدخّل في صلاحيّات رئيس الجمهورية إليّ يحكي عليها الفصل 77.

**الفصل 92.** صلاحيّات رئيس الحكومة هي:

- يعمل ويبدل وينحّي الوزارات وكتابات الدولة ويحدّد اختصاصاتها بعد ما يتشاور مع مجلس الوزراء،
- ينحّي أعضاء الحكومة وإلاّ يقرّر في خصوص استقالاتهم، وفي ما يخصّ وزير الخارجية ووزير الدفاع، يلزمو يتشاور مع رئيس الجمهورية.
- يعمل ويبدل وينحّي المؤسسات والمنشآت العمومية والمصالح الإدارية ويحدّد اختصاصاتها بعد ما يتشاور مع مجلس الوزراء، إلاّ إذا كانت تابعة لرئاسة الجمهورية.
- يعيّن وينحّي في الوظائف الإدارية الكبيرة يعني موش العسكرية. والوظائف هاذي يحددها القانون.
- رئيس الحكومة يلزمو يعلم رئيس الجمهورية بالقرارات إليّ خذاهم وإليّ يدخلو في اختصاصو.
- الإدارة العمومية على نمة رئيس الحكومة،
- وهو إليّ يعمل الاتفاقيات الدولية الفنية يعني مش المتعلقة بسيادة الدولة وإلتزاماتها الكبيرة،

- الحكومة هي المسؤولة على تنفيذ القوانين،

وينجّم رئيس الحكومة يوكل الوزارة متاعو في بعض اختصاصاتو. وإذا كان رئيس الحكومة ما ينجّمش يقوم بمهامو بصفة وقتية، يوكل واحد مالوزارة عالصلاحيات متاعو.

### **الفصل 93.** رئيس الحكومة هو رئيس مجلس الوزراء.

رئيس الحكومة هو إلي يدعو مجلس الوزراء للإجتماع وهو إلي يحطّ جدول أعمالو يعني هو إلي يقرّر المواضيع اللي باش يتحدّثو فيها.

كي بيدى مجلس الوزراء باش يتكلّم في مسائل تهّم الدفاع، وإلاّ العلاقات الخارجية، وإلاّ الأمن القومي المتعلق بحماية الدولة والتراب الوطني من التهديدات الداخلية والخارجية، يلزم رئيس الجمهورية هو إلي يرأسو موش رئيس الحكومة. وينجّم رئيس الجمهورية يحضر في مجلس الوزراء حتى في غير المواضيع هاذي ووقتها هو إلي يلزم يرأسو زادة.

أيّ مشروع قانون لازم يتّم التّداول فيه في مجلس الوزراء يعني يلزم يتناقش فيه رئيس الحكومة مع الوزارة.

**الفصل 94.** رئيس الحكومة هو إلي يمارس السلطة الترتيبية العامة يعني يصدر الأوامر إلي تنفّذ القوانين، والأوامر إلي تحطّ قواعد جديدة في غير المجالات متاع القانون وإلي قال عليها الفصل 65 ويصدر زادة الأوامر إلي تهّم الأفراد كيما أوامر التسمية والترقيات متاع الموظفين الكبار ويصحّ عليها بعد ما يتشاور مع مجلس الوزراء.

الأوامر إلي يصدرها رئيس الحكومة تتسمّى أوامر حكومية.

الأوامر إلي عندها صبغة ترتيبية يعني إلي تحطّ قواعد جديدة لازم كلّ وزير معني بيها يصحّ عليها مع رئيس الحكومة. مثلاً الأوامر

إليّ تنظّم السببّارات يلزم يصحّ عليها رئيس الحكومة ووزير الصّحة معاه.

رئيس الحكومة يصحّ زادة على كل القرارات إليّ يخذوها الوزرة.  
**الفصل 95.** الحكومة مسؤولة قدام مجلس نواب الشعب. يعني مجلس الشعب يراقب الخدمة متاعها.

**الفصل 96.** كل نائب في مجلس نواب الشعب ينجم يقدّم أسئلة شفاهية وإلا مكتوبة للحكومة على أيّ مسألة تهّم الخدمة متاعها.  
النظام الداخلي للمجلس هو إليّ ينظّم طريقة وإجراءات طرح الأسئلة هادي.

**الفصل 97.** ثلث الأعضاء على الأقل من مجلس نواب الشعب ينجمو يقدّمو مطلب لرئيس المجلس للتصويت على لائحة لوم ضدّ الحكومة باش يسحبو ثقتهم منها ويطيحوها. أما يلزمهم يقولو في المطلب علاش يحبّو يطيحو الحكومة.

والتصويت على لائحة اللوم هادي في مجلس نواب الشعب ما ينجم بصير كان بعد خمسطاش يوم من نهارت تقديمها لرئاسة المجلس.

باش تتعدّى اللائحة ويتم سحب الثقة بالحكومة يلزم أكثر من نصف أعضاء المجلس يصوتو بالموافقة ويلزمهم في نفس الوقت يقدّمو مرشّح جديد لرئاسة الحكومة ويقبلوه.

ومن بعد، رئيس الجمهورية يكلف المرشّح الجديد باش يكون حكومة كيما يقول الفصل 89.

وإذا كان اللائحة ما وافقوش عليها أكثر من نصف أعضاء المجلس، وقتها ما عايش ممكن تقديم لائحة لوم جديدة ضد الحكومة إلا بعد ستة أشهر.

ثلث الأعضاء على الأقل من مجلس نواب الشعب ينجمو يقدّمو مطلب لرئيس المجلس للتصويت على سحب الثقة من واحد من أعضاء

الحكومة وينحيوه. أما يلزمهم يقولو في المطلب علاش. وما ينجم يتنحى عضو الحكومة هادا إلا إذا كان يصوتو ضدو أكثر من نصف نواب الشعب.

**الفصل 98.** كي يستقيل رئيس الحكومة نعتبرو الحكومة الكلّ مستقيلة معاه. الاستقالة يقدمها رئيس الحكومة كتابياً لرئيس الجمهورية، ورئيس الجمهورية يُعلم رئيس مجلس نواب الشعب.

ينجم رئيس الحكومة يطلب من مجلس نواب الشعب تجديد الثقة لحكومته باش تكمل نشاطها يعني يطلب مالمجلس باش يعاود يصوت على الثقة باش ينجم يخدم بأكثر راحة، وفي الحالة هاذي إذا كان المجلس ما صوتش بأكثر من نصف أعضائو لصالح الحكومة نعتبروها مستقيلة.

وفي الحالتين، يعني في حالة إستقالة الحكومة وإلا عدم تجديد الثقة ليها، رئيس الجمهورية هو إلي يختار الشخص الأقدر ويكلفو باش يكون حكومة كيما يقول الفصل 89.

**الفصل 99.** رئيس الجمهورية ينجم يطلب من مجلس نواب الشعب باش يصوت مرة أخرى على الثقة في الحكومة باش تكمل خدمتها، والطلب هادا ينجم يعملو الرئيس مرتين برك في المدة الرئاسية متاعو.

في الحالة هاذي إذا كان المجلس ما صوتش بأكثر من نصف أعضائو لصالح الحكومة تولي الحكومة مستقيلة.

وقتها رئيس الجمهورية هو إلي يختار الشخص الأقدر ويكلفو باش يكون حكومة جديدة في ظرف شهر كيما جا في الفقرات الأولى والخامسة والسادسة مالفصل 89.

كان يفوت شهر من غير تكوين حكومة جديدة، وإلا ما نجمتش الحكومة هاذي تاخو ثقة مجلس نواب الشعب، وقتها ينجم رئيس

الجمهورية يحلّ المجلس ويدعو لإنتخابات تشريعية جديدة في مدة بين خمسة وأربعين وتسعين يوم.

وفي حالة إنو المجلس جدّد الثقة للحكومة، في المرّتين إليّ طلبهم الرئيس، وقتها رئيس الجمهورية هو إليّ يوليّ مستقيل.

**الفصل 100.** بخلاف حالات الاستقالة وسحب الثقة ، وقتليّ يصير شغور نهائيّ يعني فراغ نهائيّ في منصب رئيس الحكومة، يكلف رئيس الجمهورية مرشح الحزب وإلاّ مجموعة الأحزاب الحاكمة بتكوين حكومة جديدة في ظرف شهر.

كان يفوت شهر من غير تكوين الحكومة، وإلاّ تكوّنت لكن ما نجمت ش تاخذ ثقة مجلس نواب الشعب، وقتها رئيس الجمهورية هو إليّ يختار الشخص الأقدر ويكلفو باش يكون حكومة كيما يقول الفصل 89.

في الأثناء تواصل الحكومة القديمة تصريف الأعمال يعني تعمل للأزم في اللأزم تحت رئاسة عضو منها يختارو مجلس الوزراء ويسمّيه رئيس الجمهورية وهذا الكلّ حتّى تاخذ الحكومة الجديدة مهامها.

**الفصل 101.** المحكمة الدستورية هي إليّ تحلّ المشاكل إليّ تنجم تصير بين رئيس الجمهورية ورئيس الحكومة على صلاحيات كل واحد فيهم، والمشاكل هاذي يبيلغها إما رئيس الجمهورية وإلاّ رئيس الحكومة. والمحكمة يلزمها تحلّ المشكل هاذا في ظرف جمعة.

## **الباب الخامس. السلطة القضائية**

**الفصل 102.** القضاء سلطة مستقلة على بقية السلطات التنفيذية والتشريعية ودورها هو:

ضمان إقامة العدل على خاطر هي إليّ تفضّ النوازل بين الناس وإطبّق القانون عالناس الكلّ،

وَضْمَانُ عُلُويَةِ الدِّستورِ عَلَى خَاطِرِ هِيَ إِلَيَّ تُفَرِّضُ عَلَى السُّلْطَانِ الكَلَّ إِحْتِرَامَ الدِّستورِ يَعْنِي إِنِّو كَلَّ القَوَانِينِ وَالْأوامِرِ وَالقَرَارَاتِ إِلَيَّ تُصَدِّرُهَا السُّلْطَانُ هَازِي مَا يَلْزَمُش تَتخَالَفُ مَعَ الدِّستورِ،  
وَضْمَانُ سِيَادَةِ القَانُونِ يَعْنِي هِيَ إِلَيَّ تُفَرِّضُ إِحْتِرَامَ النَّاسِ الكَلَّ بِمَا فِيهِمُ الدُّوَلَةُ لِلقَانُونِ،

وَحِمَايَةُ الحَقُوقِ وَالْحُرِيَّاتِ عَلَى خَاطِرِ هِيَ إِلَيَّ تَرْجَعُ الحَقُوقِ لِأَصْحَابِهَا وَتُنْصَرُ المَظْلُومِ وَصَاحِبِ الحَقِّ مَهْمَا كَانَ شُكُونُ خَاصِمِهِ حَتَّى لَوْ كَانَتِ الدُّوَلَةُ نَفْسُهَا.

القَاضِي مُسْتَقَلٌّ لَا سُلْطَانَ عَلَيْهِ فِي قَضَائِهِ لِغَيْرِ القَانُونِ. يَعْنِي القَاضِي وَقَتْلَى يَحْكُمُ فِي النِّوَاذِلِ إِلَيَّ قَدَّامُو مَا يَخْضَعُ لِحَتَّى ضَعْفٍ وَلِحَتَّى سُلْطَةِ خِلَافِ سُلْطَةِ القَانُونِ.

### **الفصل 103.** القَاضِي يَلْزَمُ تَكُونُ فِيهِ شُرُوطُ مَعِينَةٍ وَهِيَ :

الكِفَاةُ يَعْنِي يَلْزَمُو يَكُونُ قَارِي وَمَتَكُونٌ مَلِيحٌ فِي القَانُونِ،  
الْحِيَادُ يَعْنِي مَا يَكُونُش يَمِيلُ لِحَتَّى طَرَفٍ لَا سِيَّاسِي وَلَا مَالِي وَلَا إِجْتِمَاعِي وَلَا جِهَوِي وَلَا دِينِي وَلَا عِرْقِي ...،  
النِّزَاهَةُ يَعْنِي يَكُونُ سُلُوكُو جَيِّدٌ وَنَظِيفٌ فِي الخِدْمَةِ وَخَارِجُهَا،  
إِذَا كَانَ القَاضِي مَا يَلْتَمِشُ بِوَأَجَابَاتِهِ ثَمَّةَ قَانُونِ يَحَاسِبُو.

**الفصل 104.** يَتَمَتَّعُ القَاضِي بِحِصَانَةٍ جِزَائِيَةٍ يَعْنِي مَا أَتَجْمُوشُ نَبْهَمُوهُ بِجَرِيمَةٍ وَإِلَّا نَتَّبَعُوهُ وَإِلَّا نُوَقِّفُوهُ إِلَّا بَعْدَمَا تَبْرَفُ عَلَيْهِ الحِصَانَةُ هَازِي،  
وَإِذَا كَانَ تَشَدَّدٌ فِي حَالَةٍ تَلْبَسُ بِالجَرِيمَةِ يَنْجَمُ يَتَوَقَّفُ وَقَتَهَا أَمَا يَلْزَمُ يَتَمَّ إِعْلَامُ مَجْلِسِ القَضَاءِ إِلَيَّ يَنْبَعْلُو بِأَشٍ يَقَرَّرُ إِذَا كَانَ تَبْرَفُ عَلَيْهِ الحِصَانَةُ وَإِلَّا لَا.

**الفصل 105.** المَحَامَاةُ مَهْنَةٌ حُرَّةٌ مُسْتَقَلَّةٌ تُعَاوَنُ القَضَاةَ فِي إِقَامَةِ العَدْلِ وَالدِّفَاعِ عَنِ الحَقُوقِ وَالْحُرِيَّاتِ.

المحامي يلزمو يتمتع بالضمانات القانونية إلی تحميه وتخليه يقوم بمهامو.

## القسم الأول: القضاء العدلي والإداري والمالي

**الفصل 106.** رئيس الجمهورية هو إلی يسمي القضاة إلی يقلو عليهم المجلس الأعلى للقضاء.

بالنسبة للقضاة السامين يعني المناصب الكبيرة في المحاكم كيما الرئيس الأول لمحكمة التعقيب، يسميهم رئيس الجمهورية بعد ما يتشاور مع رئيس الحكومة من بين قضاة يرشحهم المجلس الأعلى للقضاء بركة. يعني المجلس الأعلى للقضاء يعطي قائمة متاع قضاة ورئيس الجمهورية مع رئيس الحكومة يختارو مالقائمة هاديكا وما ينجموش سميؤ ناس أساميهم موش موجودة في القائمة إلی حطها المجلس الأعلى للقضاء.

القانون هو إلی يقول شنية المناصب القضائية العليا هادي.

**الفصل 107.** القاضي ما يمكنش نقلتو من بلاصتو إلا بموافقتو وما يمكنش زادة تنحيتو من خدمتو.

المجلس الأعلى للقضاء لا ينجم يوقف قاضي على خدمتو ولا ينجم يُعفيه ولا ينجم يعاقبو تأديبياً إلا في الحالات إلی يقول عليها القانون وبالضمانات إلی يحطها وفي كل الأحوال المجلس الأعلى للقضاء يلزمو يقول علاش خذا القرارات هادي ضد القاضي.

**الفصل 108.** كل شخص عندو الحق إنو يتحاكم محاكمة عادلة ما تطوالش فيها النازلة أكثر ماللازم. والناس الكل متساوين قدام القاضي.

من حق كل شخص إنو يطلب مالقضاء إنو ياخذلو حقو ومن حق كل شخص إنو يدافع على نفسه وعلى مصالحو قدام القاضي، والقانون يلزمو يسهل إمكانية اللجوء للقضاء وبالنسبة للناس إلی ماعندهمش

فلوس، القانون يُفرض على الدولة إنَّها تعطيتهم إعانة عدلية يعني تعاونهم على مصاريف القضية متاعهم.

من حق الناس الكلّ إنَّهم يتقاضوا على درجتين يعني عندهم الحق باش القضية متاعهم تتراجع مرّة أخرى قدام قاضي آخر، هاذاكا علاش إنَّجمو نستينفو الأحكام الكلّ.

الجلسات في المحاكم تكون علنية إلا في حالات يقولهم القانون والتصريح بالحكم ما ينجم يكون إلا في جلسة علنية. يعني الجلسات متاع المحاكم ينجم يحضر فيها أي واحد إلا في الحالات إلي القانون يسمح فيها بالسرية.

**الفصل 109.** ممنوع التدخّل في القضاء. يعني حتى حدّ وحتى سلطة ماهو من حقّها إنَّها تتدخّل في خدمة القضاة وإلا تعمل ضغوطات عليهم وقتلي يكونو يحكمو في القضايا.

**الفصل 110.** أنواع المحاكم ما تنجم تتكوّن كان بقانون.

وممنوع تكوين محاكم إستثنائية، يعني محاكم تتكوّن باش تحاكم أشخاص معينين كيما السياسيين مثلا في محكمة أمن الدولة قبل. وممنوع زادة إنَّها تتحدّ إجراءات استثنائية تحرم الناس من حقّهم في المحاكمة العادلة مثلا من حقّهم في الدفاع على أنفسهم.

المحاكم العسكرية هي محاكم مخصّصة كان في الجرائم العسكرية. والقانون هو إلي ينظّمها.

**الفصل 111.** الأحكام القضائية تصدر بإسم الشعب والتنفيذ متاعها يكون بإسم رئيس الجمهورية، وممنوع تعطيل تنفيذها إلا في الحالات إلي يسمح بيها القانون.

**الفرع الأول: المجلس الأعلى للقضاء**

**الفصل 112.** المجلس الأعلى للقضاء فيه أربعة هيئات :

مجلس القضاء العدلي يعني الهيئة إلي لاهية بالقضاء إلي يحكم مثلا بين الناس العاديين كيفي وكيفك وإلا بين الشركات الخاصة وإلا بين الشركات هاذي والخدامة متاعها،

مجلس القضاء الإداري يعني الهيئة إلي لاهية بالقضاء إلي يحكم في النوازل بين الإدارة والناس وإلا بين الإدارة والموظفين متاعها وإلا بين الإدارات العمومية في بعضهم،

مجلس القضاء المالي يعني الهيئة إلي لاهية بالقضاء إلي يراقب أي واحد يتصرف في فلوس الدولة،

الجلسة العامة للمجالس القضائية يعني الهيئة إلي تلم هالمجالس الثلاثة (العدلي والإداري والمالي).

كل وحدة مالهيات هاذم تتكون من :

ثلثين يلزم يكونو مالقضاة وأكثر من نصهم مُنتخبين والبقية معيّنين على أساس المنصب متاعهم،

الثلث الباقي من ناس ماهمش قضاة أما مختصين في القانون كيما المحامين مثلا وإلا أساتذة في الجامعة ويلزم يكونو مستقلين.

وفي كل الحالات، الهيات هاذي الكل يلزم يكون أكثر من نصفها مُنتخبين وانتخابهم يكون لمدة ستة سنين بركة من غير ما ينجمو يعاودو،

والمجلس الأعلى للقضاء يختار رئيسو بين أعضاؤو القضاة الأعلى رتبة،

القانون هو إلي ينظم صلاحيات وتركيبية وإجراءات كل واحد مالمجالس القضائية هاذي والجلسة العامة إلي تجمعهم.

**الفصل 113.** المجلس الأعلى للقضاء عندو إستقلالية إدارية يعني ماهو تابع لحتى إدارة وإلا وزارة ويتصرف بنفسو في الفلوس إلي

تجيه من الدولة ويسير نفسو بنفسو، ويحضر وحدو مشروع ميزانيتو ويناقشو قدام اللجنة المختصة في مجلس نواب الشعب.

**الفصل 114.** المجلس الأعلى للقضاء يُضمن حسن سير القضاء يعني هو إلی مسؤول على إتبو المحاكم والقضاة يخدمو مليح وبإستقلالية يعني يحميهم من أي حدّ يحبّ يتدخل فيهم وإلا ياتر عليهم.

إذا كان القضاء يحتاج إصلاحات فإنّو الجلسة العامة للمجالس القضائية الثلاثة (العدي والإداري والمالي) هي إلی تقترح الإصلاحات هادي،

مقترحات ومشاريع القوانين إلی تهمّ القضاء يلزم تتعرض قدام الجلسة العامة للمجالس القضائية الثلاثة باش تعطي رايها فيها،

كلّ واحد مالمجالس القضائية الثلاثة يقرّر في المسار المهني يعني في الترقية مثلا متاع القضاة إلی يتبعوه وهو إلی يقرّر زادة في تأديبهم يعني معاقبتهم كان ما قاموش بواجباتهم.

كل عام، في أجل ما يفوتش شهر جويلية، المجلس الأعلى للقضاء يحضر تقرير على الخدمة إلی قام بيها في العام هاداكا ويقدمو لرئيس الجمهورية، ورئيس مجلس نواب الشعب، ورئيس الحكومة. والتقرير هادا يلزم يتنشر.

مجلس نواب الشعب يناقش التقرير هادا كي تبدا السنة القضائية في جلسة عامة للحوار مع المجلس الأعلى للقضاء.

### الفرع الثاني: القضاء العدي

**الفصل 115.** القضاء العدي نلقاو فيه :

محكمة التعقيب وهي أعلى محكمة،

محاكم درجة ثانية وهي بصفة عامة محاكم الإستئناف،

محاكم درجة أولى وهي بصفة عامة المحاكم الابتدائية ومحاكم الناحية،

النيابة العمومية إلی تتكوّن من قضاة اختصاصهم إنهم يحرّكو القضية في الجرائم، عندها نفس الضمانات إلی يعطيها الدستور للقضاء بصفة عامة،

والقضاء إلی في النيابة العمومية يخدمو بالطريقة إلی حددها لهم القانون وعلى حسب سياسة مقاومة الإجرام متاع الدولة.

كل عام، محكمة التعقيب تحضّر تقرير على الخدمة إلی قامت بيها في العام هذا كما وتقدّمو لرئيس الجمهورية، ورئيس مجلس نواب الشعب، ورئيس الحكومة ورئيس المجلس الأعلى للقضاء. والتقرير هذا يلزم يتنشر.

القانون هو إلی ينظّم طريقة عمل وصلاحيات القضاء العدلي والإجراءات قدامو وينظّم زادة خدمة القضاة العدليين.

### الفرع الثالث: القضاء الاداري

#### الفصل 116. القضاء الإداري نلقاؤ فيه :

محكمة إدارية عليا وهي أعلى محكمة في القضاء الإداري،  
محاكم إدارية إستئنافية،  
محاكم إدارية إبتدائية.

القضاء الإداري يحكم في القضايا إلی تكون فيها الإدارة العمومية تجاوزت فيها سلطتها يعني وقتلي تكون الإدارة ما إحترمتش القانون ويحكم في النوازل إلی داخلة فيها الدولة.

القضاء الإداري زادة عندو مهمّة إستشارية، يعني ينجم رئيس الجمهورية وإلا رئيس الحكومة يطلبو رايو في أي موضوع يهّم تطبيق القانون.

كل عام، المحكمة الإدارية العليا تحضّر تقرير على الخدمة إليّ قامت بيهها في العام هاذاكا وتقدّمو لرئيس الجمهورية، ورئيس مجلس نواب الشعب، ورئيس الحكومة ورئيس المجلس الأعلى للقضاء. والتقرير هاذا يلزم يتنشر.

القانون هو إليّ ينظّم طريقة عمل وصلاحيات القضاء الإداري والإجراءات قدامو وينظّم زادة خدمة القضاة الإداريين.

### الفرع الرابع: القضاء المالي

**الفصل 117.** القضاء المالي يتكوّن من محكمة المحاسبات إليّ فيها برشة هيئات.

محكمة المحاسبات تراقب الطريقة إليّ إتّم بيهها صرف المال العام، إليّ هو فلوسي وفلوسك وفلوس الناس الكلّ وإليّ جاي من الضرائب إليّ ندفعوها، وثبتت إذا كان الفلوس هاذي تُصرفت بشافية يعني بطريقة ينجم كل واحد يعرف وين تصرفت وإذا كان تصرفت في بلاصتها وإلا لا وإذا كان تصرفت بالطريقة إليّ يقول عليها القانون.

وهي إليّ تراقب الخدمة متاع المحاسبين العموميين يعني الموظفين إليّ مسؤولين على فلوس الدولة وتعاقب المسؤولين على الأغلاط في حسابات الدولة.

وتعاون الحكومة ومجلس نواب الشعب على تسكير ميزانية الدولة وتنفيذ قوانين المالية.

كل عام، محكمة المحاسبات تحضّر تقرير على الخدمة إليّ قامت بيهها في العام هاذاكا وتقدّمو لرئيس الجمهورية، ورئيس مجلس نواب الشعب، ورئيس الحكومة ورئيس المجلس الأعلى للقضاء. والتقرير هاذا يلزم يتنشر. وتنجّم زادة تحضّر تقارير خاصة تُنجم تنشر.

القانون هو إليّ ينظّم طريقة عمل وصلاحيات القضاء المالي والإجراءات قدامو وينظّم زادة خدمة القضاة متاعو.

## القسم الثاني. المحكمة الدستورية

**الفصل 118.** المحكمة الدستورية هيئة قضائية مستقلة يعني ماهي تابعة لحتى إدارة وإلا وزارة ولحتى سلطة سياسية.

وهي متكوّنة من أثناس عضو عندهم كفاءة، تسعة منهم من المختصين في القانون إلي عندهم عالأقل عشرين سنة خبرة .

رئيس الجمهورية، ومجلس نواب الشعب، والمجلس الأعلى للقضاء هوما إلي يعينوا أعضاء المحكمة الدستورية. كل واحد منهم يسمي أربعة، ثلاثة مالأربعة هاذم يلزم يكونو مختصين في القانون وهاذم الكل يتسموا لمدة تسع سنين ما تتجددش.

يتبدلو أربعة أعضاء من المحكمة هاذي كل ثلاث سنين، ويتعوض الأعضاء المستقيلين وإلا المتوفين على حسب السلطة إلي سماتهم وعلى حسب إختصاصهم.

أعضاء المحكمة الدستورية هوما إلي ينتخبو رئيس من بيناتهم ويلزم يختاروه من بين المختصين في القانون.

**الفصل 119.** أعضاء المحكمة الدستورية ما ينجموش يخدمو أي خدمة أخرى في الفترة إلي يكونو فيها أعضاء في المحكمة الدستورية.

**الفصل 120.** ما فمة كان المحكمة الدستورية عندها الحق باش تشوف إذا كان تم إحترام الدستور بالنسبة ل:

- مشاريع القوانين إلي يعرضوهم عليها إمّا رئيس الجمهورية وإلا رئيس الحكومة وإلا ثلاثين نائب من مجلس نواب الشعب في ظرف سبعة أيام من نهارت إلي وافق المجلس على مشروع القانون وإلا من نهارت الموافقة على مشروع قانون تبدل بعد ما رجعو رئيس الجمهورية،

- مشاريع القوانين الدستورية إليّ يتحدّث عليها الفصل 144 وإجراءات تعديل الدستور،
- الإتفاقيات الدولية إليّ يعرضها عليها رئيس الجمهورية قبل ما يصحّ مشروع قانون الموافقة عليها،
- القوانين إليّ تبعثها المحاكم وقتليّ في قضية معينة واحد من المتقاضين يقول للقاضي إليّ باش يحكم عليه راهو القانون إليّ باش تطبقو عليّ مخالف للدستور، وقتها المحكمة توقّف القضية وتسال المحكمة الدستورية إذا كان القانون هذا بالحقّ مخالف للدستور وإلاّ لا.
- النظام الداخلي لمجلس نواب الشعب إليّ يعرضو عليها رئيس المجلس.

وتنجم المحكمة تقوم بكل المهام الأخرى إليّ قال عليها الدستور.

**الفصل 121.** المحكمة الدستورية تاخذ قرارها في ظرف خمسة وأربعين يوم من نهارت إليّ جابولها الطعن إليّ يشكك في دستورية القانون،

والقرار هذا تاخذو بأكثر من نصف أعضائها يعني يلزم يكونو موافقين عليه سبعة على الأقل.

قرار المحكمة الدستورية يلزمو يقول إذا النصّ إليّ سألوها عليه يتماشى مع الدستور وإلاّ لا ويلزم المحكمة تعلّل قرارها يعني يلزم تبين علاش اعتبرت النصّ إحترم وإلاّ ما إحترمش الدستور.

قرارات المحكمة الدستورية يلزم تنبشّر في الرائد الرسمي للجمهورية التونسية ويلزم كل السلط في البلاد تحترمهم وتنفذهم،

إذا كان فاتو خمسة وأربعين يوم من غير ما تاخو المحكمة الدستورية قرارها، يلزمها ترجع مشروع القانون إليّ تُعرض عليها لرئيس الجمهورية بالوقت.

**الفصل 122.** إذا كان المحكمة الدستورية قالت إلی مشروع القانون موش دستوري وقتها يلزم يرجع لرئيس الجمهورية وهو يرجعو لمجلس نواب الشعب باش يتناقش فيه مرة أخرى ويصلحو على حسب قرار المحكمة. وقَبْل ما يختمو رئيس الجمهورية، يلزمو يعاود يرجعو للمحكمة الدستورية باش تعاود تثبت إذا كان ولى يحترم الدستور بعد ما عاود نُظِرَ فيه المجلس.

إذا كان المحكمة الدستورية قالت إلی المشروع يثمأشى مع الدستور وإلا رجعتو لرئيس الجمهورية على خاطر تعداو خمسة وأربعين يوم وهي ما خذانتش قرارها ورئيس الجمهورية رفضو ورجعو لمجلس نواب الشعب باش يناقشو مرة أخرى والمجلس بدّل في المشروع هاذاكا حاجات، في الحالة هاذي يلزم رئيس الجمهورية يعاود يعرضو على المحكمة الدستورية قبل ما يصححو باش تثبت إذا كان الحاجات إلی بدّلها المجلس تحترم الدستور وإلا لا.

**الفصل 123.** إذا كان وُصِلَ للمحكمة الدستورية دفع بعدم دستورية قانون معين، يعني إنو واحد قال قدام القاضي إنو القانون إلی باش يطبقو عليه مخالف للدستور والقاضي بعث بالمسألة هاذي للمحكمة الدستورية:

المحكمة الدستورية في الحالة هاذي ما تثبت كان في الفصول إلی قال عليهم المتقاضي، وتاخو قرارها في ظرف ثلاثة شهر إنجمو نمدوهم لستة شهر ويلزم تقول في قرارها علاش اعتبرت القانون إلی بعثو لها القاضي متاع النازلة الأصلية يحترم الدستور وإلا لا.

إذا كانت صرحت المحكمة الدستورية بمخالفة فصول معينة من القانون للدستور فإنو الفصول هاذيكا برك هي إلی ما عادش تطبق.

**الفصل 124.** القانون هو إلی ينظم المحكمة الدستورية والطريقة إلی تخدم بيها والضمانات إلی يتمنعو بها الأعضاء متاعها.

## الباب السادس. الهيئات الدستورية المستقلة

**الفصل 125.** الهيئات هاذي إلي حطها الدستور مستقلة يعني حتى سلطة ما تدخل فيهم. مهمتهم يحميو الديمقراطية ويقويوها. وكل مؤسسات الدولة ملزومة باش تسهلهم خدمتهم.

هالهيئات عندها شخصية خاصة بيها إلي تخليها تسير أمورها وتتصرف في فلوسها بنفسها. تتكون هالهيئات هاذي من ناس ينتخبهم مجلس نواب الشعب بأغلبية كبيرة مالنواب تتجم تكون بالثلثين وإلا بثلاثة أرباع وإلا بثلاثة أحماس. كل هيئة من الهيئات هاذي تعمل كل عام تقرير للمجلس يناقشوها فيه النواب في جلسة عامة.

القانون هو إلي يقول من شكون تتكون هالهيئات هاذي وشكون يمثل فيها وكيفاش يتم انتخاب الأشخاص إلي يكونوها وكيفاش تنظم وكيفاش تحاسب.

### القسم الأول. هيئة الانتخابات

**الفصل 126.** هيئة الانتخابات إلي نسميها "الهيئة العليا المستقلة للانتخابات" خدمتها تعمل، تنظم وثرأقب كل مراحل الانتخابات والاستفتاء إلي نطلبو فيه مالشعب باش يعطى رايو في نص قانوني ولا قرار باش تاخذو الدولة. هالهيئة تضمن للتوانسة إنو الانتخابات تكون شفافة ومن غير غشة والهيئة هاذي هي إلي تقول على نتائج الانتخابات وإلا الاستفتاء.

الهيئة هاذي هي إلي تحط القواعد المتعلقة بالانتخابات والاستفتاءات وإلي ما حكاش عليها القانون.

هيئة الانتخابات مكوونة من تسعة من الناس مستقلين يعني ما يلزمهمش يكونو تابعين لحتى حزب وإلا جهة سياسية ويلزم يكونو نظاف ومكونين بالقد في ميدان الانتخابات، الأعضاء هادم يخدمو لمدة وحدة تودم ستة سنين وكل عامين يتبدلو ثلاثة منهم.

## القسم الثاني. هيئة الاتصال السمعي البصري

**الفصل 127.** هيئة الاتصال السمعي البصري إلي هي هيئة الراديووات والتلفز، مهمتها تنظيم خدمة وسائل الاتصال هاذي وتحسينها ومهمتها زادة ضمان حقّ الناس باش يعبرو بكلّ حرية وباش يلقو وسائل إعلام متعدّدة ومتنوّعة موش الكها تقول وتعاود نفس الكلام لكن زادة وسائل إعلام نظيفة ينجم الواحد يعطيها ثقة.

الهيئة هاذي هي إلي تحطّ القواعد المتعلقة بتنظيم الميدان متاعها وإلي ما قالش عليها القانون ويلزم السلطة تشاورها على كل مشاريع القوانين إلي داخله في إختصاصها.

هيئة الإتصال السمعي البصري مكوّنة من تسعة من الناس مستقلّين يعني ما يلزمهمش يكونو تابعين لحتّى حزب وإلاّ جهة سياسية ويلزم يكونو نظاف ومثكونين بالقدّا في ميدانهم، الأعضاء هاذم يخدمو لمدة وحدة ثدوم ستة سنين وكل عامين يتبدّلو ثلاثة منهم.

## القسم الثالث. هيئة حقوق الانسان

**الفصل 128.** تراقب هيئة حقوق الإنسان احترام حريات وحقوق الناس والهيئة هاذي تعمل كل جهدها باش تقوي الحقوق والحريات هاذي وتعطي أفكار لتحسين وضعهم، ويلزم السلطة تاخذ رايها فيما يخصّ كل القوانين إلي باش تتعمّل في مجال إختصاصها.

تعمل الهيئة بحث في الحالات إلي ياقع فيها اعتداء على حقوق الانسان باش تلقأها حلّ وإلاّ تعديها للجهات المسؤولة كيما القضاء،

هيئة حقوق الإنسان مكوّنة من ناس مستقلّين يعني ما يلزمهمش يكونو تابعين لحتّى حزب وإلاّ جهة سياسية ويلزم يكونو نظاف ومثكونين بالقدّا في ميدانهم، الأعضاء هاذم يخدمو لمدة بركة ثدوم ستة سنين.

## القسم الرابع. هيئة التنمية المستدامة وحقوق الأجيال القادمة

**الفصل 129.** السلطة ملزومة باش تشاور هيئة التنمية المستدامة، يعني التنمية إلی ما تُهمَّش الأجيال الحاضرة أَكْهَوُ أما زادة الأجيل الجاية وحقوقها، في مشاريع القوانين إلی تهمّ الأمور الإقتصادية والإجتماعية وإلی تَتَعَلَّقُ بِالْبِيئَةِ والبرامج إلی تَعْمَلُهم الدولة على خمسة وإلا عشرة سنين مثلا فيما يخصّ تنمية البلاد. وتعطي الهيئة رايبها في كل الأمور إلی تُهمَّها.

هيئة التنمية المستدامة وحقوق الأجيال القادمة مُكُونَةُ من ناس مستقلين يعني ما يلزمهمش يكونو تابعين لحتّى حزب وإلا جهة سياسية ويلزم يكونو نظاف ومِنكُونين بالقدا في ميدانهم، الأعضاء هاذم يخدمو لمدة بركة تُدوم سَنَّة سنين.

## القسم الخامس. هيئة الحوكمة الرشيدة ومحاربة الفساد

**الفصل 130.** تشارك هيئة الحوكمة الرشيدة ومكافحة الفساد في وضع سياسة الحوكمة الرشيدة يعني السياسة إلی يشارك فيها المواطن بالحق، وإلی قايمه على الإستحفاظ على فلوس الشعب وثروات البلاد والهيئة إِنْتَابَع تنفيذ السياسات هاذي وهي إلی باش تَعْلَم الناس كيفاش هوما نَفْسُهم يَبْغِدُو على الفساد ويقاوموه،

وهذا الكل ما هو ممكن إلا إذا كان نَقَوِيُو مبادئ الشفافية والنزاهة والمساءلة يعني إتو كل شيء في السلطة يلزم يَتَعْمَل قَدَام الناس الكلّ باش إنْجَمُو نراقبوه، وإتو كلّ المسؤولين في البلاد يكونو نظاف وإتْجَمُو نحاسبوهم إذا كان يُغْطُو في حق التوانسة.

الهيئة تَلَوِّج على حالات الفساد في الإدارة وعند الخواص وتَبْحَث فيها وتَبْحَقُ منها وتعديها للسلط إلی باش تُنظر فيها كيما القاضي.

يلزم السلطة تاخذ راي الهيئة هاذي في القوانين إلی باش تَتَعْمَل وإلي داخلة في إختصاصها كيما يمكن للهيئة باش تعطي رايبها في

النصوص الترتيبية يعني النصوص إلي يصدرها رئيس الحكومة وإلي داخلة في إختصاصها.

هالهيئة هاذي مكوّنة من تسعة من الناس مستقلّين يعني ما يلزمهش يكونو تابعين لحتّى حزب وإلاّ جهة سياسية ويلزم يكونو نظاف ومثكّونين بالقدّا في ميدانهم، الأعضاء هاذم يخدمو لمدة بركة تدوم ستة سنين وكل عامين يتبدّلو ثلاثة منهم.

### الباب السابع. السلطة المحلية

**الفصل 131.** السلطة المحلية قائمة على أساس اللامركزية يعني إنو يلزم تخليّ البلديات والجهات والأقاليم تحكّم نفسها بنفسها في المسائل إلي تهمّها وإلي يضبطها القانون.

اللامركزية هاذي هي تنظيم تُراب تونس على أساس جماعات محلية تكون بلديات وجهات وأقاليم حسب التقسيم إلي يحدّدو القانون وهكاكا تولّي كل بلاصة في تونس تابعة في نفس الوقت لبلدية ولجهة وإقليم.

يمكن للقانون يزيد يعمل أنواع أخرى مالجماعات المحلية.

**الفصل 132.** الجماعات المحلية عندها شخصية خاصة بيها إلي تخليها تُسيّر أمورها وتتصرّف في فلوسها بنفسها. والجماعات هاذيا تُنظّم وتُسيّر مصالحها إلي حدّدهاها القانون بحرية ومن غير ما تتدخّل فيها السلطة المركزية.

**الفصل 133.** الجماعات المحلية هذيا يسيروها مجالس مكوّنة من ناس مُنتخبة.

الناس إلي يكوّنو المجالس متاع البلديات والجهات يُنتخبوهم السكان والانتخابات هاذي تكون:

عامة : معناها التوانسة الكلّ يشاركو فيها من غير إقصاء على أساس الجهة إليّ جاو منها وإلّا على أساس مرا ولاّ راجل وإلّا على أساس مسلم وإلّا مش مسلم وإلّا على أساس يعرف وإلّا ما يعرفش يقرا ...

حرة : معناها الناس تشارك فيها من غير ضغط وبكل حرية مباشرة. يعني الناخب هو بنفسو إليّ يصوّت للمترشحين متاعو من غير وسيط.

سريّة: يعني يلزمو يدخل للخلوة نهار التصويت باش ما يعرف حتى حدّ اختيارو.

نزيهة: يعني المنافسة فيها بين المترشحين تكون شريفة ومن غير ممارسات غير قانونية للتأثير على الناخبين وتكون فيها الإدارة الانتخابية ماهيش منازرة لحتى مترشح.

شفافة: يعني تكون قواعد الانتخابات معروفة للعباد الكلّ وفمة ملاحظين مالمجمعيّات ويكون حساب النتائج قدامهم ومن غير تمكليك وتلوعيب وزور.

النّاس إليّ في المجالس البلدية والجهوية هي إليّ تتنّخب الناس إليّ في مجالس الأقاليم.

القانون متاع الانتخابات يُضمن للشباب بلاصتو في المجالس متاع الجماعات المحلية.

**الفصل 134.** الجماعات المحلية عندها صلاحيات خاصة بيها وصلاحيات تقسمها مع السلطة إليّ في العاصمة وصلاحيات تسلمها فيها السلطة المركزية.

توزيع الصلاحيات إليّ بينها وبين السلطة المركزية وإلا الصلاحيات إليّ تسلمها فيها السلطة المركزية يكون على أساس مبدأ التفريع يعني إنّو المجالس المحليّة تاخذ الاختصاصات إليّ تهّم أمورها يعني بلغة أخرى السلطة المركزية تتخلى على الأمور إليّ تهّم السلطة المحليّة.

الجماعات المحلية تُنَجِّم تحطّ القواعد إلیّ تُهْمُها وإلیّ ما حُكَّاش علیها القانون، هالقواعد هاذي تَتَنَشَّرُ في جريدة رسمية للجماعات المحلية.

**الفصل 135.** الجماعات المحلية عندها مداخيل متاعها تُجِيبُها وَحَدَّها وفلوس تُعْطِيهَا السُلْطَة المركزيّة وهالمداخيل هاذيّا تكون على قَدّ الصلاحيات إلیّ يَعْطِيهَا القانون.

كل صلاحية جديدة وإلاّ كل صلاحية تُعْطِيهَا السُلْطَة المركزيّة يلزم يقابلها زيادة في المداخيل.

القانون ينظّم كيفاش تَتَصَرَّفُ الجماعات المحلية في فلوسها.

**الفصل 136.** على أساس مبدأ التضامن، السُلْطَة المركزيّة تزيد في الفلوس للجماعات المحلية المحتاجة باش يكون ثمة عدل بين الجهات الفقيرة والغنية.

السُلْطَة المركزيّة تعمل اللازم باش يكون المصروف يقابل المدخول متاع الجماعة المحلية.

يمكن تخصيص بَأيّ من مدخول الثروات الطبيعية باش نُنَمِّيُو الجبهات الكلّ.

**الفصل 137.** الجماعات المحلية تَتَصَرَّفُ بكلّ حرية في الفلوس الموجودة في ميزانيتها ويلزمها تحترم قواعد الحوكمة الرشيدة يعني إلیّ يشارك فيها المواطن بالحق، وإليّ قائمة على الإستحفاظ على فلوس الشعب وثروات البلاد ويراقبها القاضي المالي.

**الفصل 138.** ما نجموش نراقبو خدمة الجماعات المحلية قبل ما تعملها أما نجمو نراقبوها من بعد باش انبثو اذا كانت مطابقة للقانون.

**الفصل 139.** الجماعات المحلية تستعمل طريقة تشريك المواطنين في اتخاذ القرار ويلزم تخليّ المواطنين والمجتمع المدني، يعني الجمعيات مثلا، يشوفو خدمتها ويشاركوها في تحضير برامج التنمية

والتهيئة الترابية كيما تنظيم البني والمساحات الخضراء والكياسات ويراقبو تنفيذها كيما يقول القانون.

**الفصل 140.** الجماعات المحلية تُنَجِّمُ تَتَّعَوْنَ وإلَّا تَتَشَارِكُ مَعَ بَعْضِهَا باش تعمل برامج وإلَّا حاجات فيها مصلحة تُهَمُّهُمُ الكُلَّ.

والجماعات المحلية تَنَجِّمُ تعمل علاقات مع الخارج باش تَتَشَارِكُ وتَتَّعَوْنَ مَعَ جماعات أجنبية كيفها.

القانون هو إلی يحدّد القواعد متاع الشراكة والتعاون هذا.

**الفصل 141.** الجماعات المحلية هادي عندها هيكل يَمَثِّلُهَا إِسْمُو المجلس الأعلى للجماعات المحلية ومقرّو يلزم يكون خارج العاصمة.

المجلس الأعلى للجماعات المحلية يَتْلَهُ بِالْأُمُورِ إِلَى تَهْمِ التَّنْمِيَةِ والعدالة بين الجيهاات ويعطي رايو في مشاريع القوانين إِلَى تَهْمِ التخطيط والميزانية والمالية المحلية كيف الزبلة والخروبة. وِينَجِّمُ مجلس نواب الشعب يستدعي رئيس المجلس هادايا باش يحضر نقاشاتو.

القانون هو إلی يقرّر كيفاش يَنْكُونُ المجلس الأعلى للجماعات المحلية وهو إلی يحدّد المهام متاعو.

**الفصل 142.** وقتلي تصير مشاكل في الصلاحيات بين الجماعات المحلية بين بعضها وإلَّا مَعَ السلطة المركزية، القاضي الاداري هو إلی يَفْطُهَا.

## الباب الثامن. تعديل الدستور

**الفصل 143.** رئيس الدولة وإلَّا ثلث النواب عندهم الحق باش يقترحو تبديل في فصول مالدستور، ومقترح رئيس الجمهورية يَنْعَدَى قَبْلُ.

**الفصل 144.** رئيس مجلس نواب الشعب يلزم يعرض على المحكمة الدستورية كل مقترح لتبديل فصول مالدستور باش تعطي رايها

وتقول اذا كان المقترح هذا ما يمسُّ مالحاجات إلی الدستور يمنع تبديلها.

مجلس نواب الشعب يَبْدَأ قَبْلَ كل شيء يَصَوِّتُ بِأَكْثَر من نصف نَوَابِو على فكرة التبدیل في الدستور.

ومن بَعْد، باش يَبْدَأُ فصول مالدستور يلزم يوافقو ثلثين من النواب على الأقل. وينجَم رئيس الجمهورية يَعْدِيهِ عَالِستفتاء يعني يسأل الشعب إذا كان موافق وإلا لا بعد ما يوافقو ثلثين من النواب على الأقل، وفي الحالة هاذي ما يتعدى التبدیل كان وقتلي يوافقو عليه نصف التوانسة إلی شاركو في الاستفتاء عالأقل.

## الباب التاسع. الفصول الختامية

**الفصل 145.** التوطئة إلی جات مالأول هي جزء مالدستور يعني تابعتو ومأنجموش نُفصلوها عليه.

**الفصل 146.** كي نجيو نفسرو فصل مالدستور هذا يلزمننا نخطو في بالنا الفصول لخرى الكل.

**الفصل 147.** بعد ما إتم الموافقة على الدستور نُكَلُو كيما قال الفصل الثالث متاع القانون إلی جا ينظم بصفة مؤقتة السلط العمومية، يجتمع المجلس التأسيسي في ظرف جمعة باش يصحح رئيس الدولة ورئيس المجلس ورئيس الحكومة الدستور. ورئيس المجلس هو إلی يعطي الإذن للمطبعة الرسمية باش تُنشر في عدد خاص مالرايد الرسمي. يَبْدَأ الدستور قابل للتنفيذ دوب ماينتشر. رئيس المجلس يقول للناس وقتاش باش يينتشر.

## الباب العاشر. الأحكام الانتقالية

**الفصل 148. 1.** نُكَمَلُو نخدمو بالفصول 5 و6 و8 و15 و16 مالتنظيم المؤقت للسلط العمومية حتى ننتخبو مجلس نواب الشعب الجديد.

نَكْمَلُو نَحْدُمُو بالفصل الرابع مالتنظيم المؤقت للسلط العمومية حتى انتخاب مجلس نواب الشعب. أما من 10 فيفري، تاريخ نشر الدستور ما عاشر يَنْقَبِلْ حتى مقترح قانون من عند النواب إلا إذا كان المقترح يَوْمَ إمَّا الانتخابات وإلا العدالة الانتقالية وإلا الهيئات إلی عَمَلُهُم المجلس التأسيسي.

نَكْمَلُو نَحْدُمُو بالفصول 7 و9 و10 و11 و12 و13 و14 و26 مالتنظيم المؤقت للسلط العمومية حتى نِنْتَخِبُو رئيس الجمهورية كما يقول الفصل 74 متع الدستور والفصول الى جات بعدو.

نَكْمَلُو نَحْدُمُو بالفصول 17 و18 و19 و20 مالتنظيم المؤقت للسلط العمومية حتى تَحْصَلْ أَوَّلْ حكومة على ثقة مجلس نواب الشعب.

يَكْمَلْ المجلس الوطني التأسيسي يحطّ القوانين ويراقب الحكومة ويستعمل الصلاحيات الانتخابية إلی قال عليها التنظيم المؤقت للسلط العمومية والقوانين الأخرى حتى نِنْتَخِبُو مجلس نواب الشعب.

2. الفصول إلی باش نُذَكْرُوها تَبْدَا تَنْفَذْ بالطريقة هادي :

نُطَبِّقُو فصول الباب الثالث إلی تُهْمُ السلطة التشريعية إلا الفصول 53 و54 و55 والقسم الثاني مالباب الرابع المتعلق بالحكومة من يوم الإعلان على النتائج متاع أول إنتخابات تشريعية.

نُطَبِّقُو فصول القسم الأول مالباب الرابع إلی يَوْمَ رئيس الجمهورية إلا الفصول 74 و75 من نهارت الإعلان على النتائج متاع أول انتخابات رئاسية. وما نُطَبِّقُو الفصول 74 و75 إلا في ما يخص رئيس الجمهورية إلی باش نِنْتَخِبُوه انتخاب مباشر.

نُطَبِّقُو فصول القسم الأول مالباب الخامس إلی يَوْمَ القضاء العدلي والإداري والمالي إلا الفصول 108 و109 و110 و111 وقتلي يَنْكُونُ المجلس الأعلى للقضاء.

نُطَبِّقُ فصول القسم الثاني مالباب الخامس إلی یهْمُ المحكمة الدستورية، إلا الفصل 118، وقتلَى تَتَكُونُ المحكمة الدستورية.

نُطَبِّقُ فصول الباب السادس إلی یهْمُ الهيئات الدستورية وقتلَى نِنْتَخِبُ مجلس نواب الشعب.

نُطَبِّقُ فصول الباب السابع إلی یهْمُ السلطة المحلية وقتلَى نَعْمَلُ القوانين إلی تَنْظُمُهَا.

3. تصير الانتخابات الرئاسية والتشريعية بعد أربع شهر من تكوين الهيئة العليا المستقلة للانتخابات وفي كل الحالات قبل ما يوفى عام 2014.

4. إنَّ التزكية يعني مساندة المترشحين في أول إنتخابات رئاسية من نواب بالمجلس الوطني التأسيسي وإلا من عدد ماناخبين المسجلين في القائمة الإنتخابية كما يقول القانون الانتخابي.

5. في ظرف ستة شهر من تاريخ الإنتخابات التشريعية يلزم يَنْتَوْنُ المجلس الأعلى للقضاء وفي ظرف عام من تاريخ الإنتخابات هادي يلزم تَتَكُونُ المحكمة الدستورية.

6. باش نَجَدُّو المرة الأولى والثانية ثلث أعضاء المحكمة الدستورية وهيئة الانتخابات وهيئة الاتصال السمعي البصري وهيئة الحوكمة الرشيدة ومكافحة الفساد نِسْتَعْمَلُو الْقُرْعَةَ بين الأعضاء إلی تَسْمَاوُ المرة الأولى والقرعة ما يَدْخُلْش فيها الرئيس.

7. في ظرف ثلاثة شهر من ختم الدستور يَكُونُ المجلس الوطني التأسيسي بقانون أساسي هيئة وقتية باش تراقب إذا كان مشاريع القوانين تَحْتَرَمُ الدستور وإلا لا. والهيئة هادي تَتَكُونُ من :

- الرئيس الأول لمحكمة التعقيب، يكون رئيس،

- الرئيس الأول للمحكمة الإدارية، يكون عضو،

- الرئيس الأول لدائرة المحاسبات، يكون عضو،

- ثلاثة مختصين في القانون يسميهم رئيس المجلس الوطني التأسيسي ورئيس الجمهورية ورئيس الحكومة.

المحاكم الأخرى الكل معادش تُنجم تُراقب دستورية القوانين.

الهيئة هادي توفى مهمتها وقتلي نعملو محكمة دستورية.

8. تكمل الهيئة الوقتية للإشراف على القضاء العدلي خدمتها حتى لين نكوئو مجلس القضاء العدلي.

وتكمل الهيئة المستقلة للاتصال السمعي البصري خدمتها حتى ننتخبو هيئة الاتصال السمعي البصري.

9. الدولة يلزمها تطبق العدالة الانتقالية إلی تهم محاسبة إلی ظلّموا التوانسة وتعدّاو عليهم وترجع حقوق المظلومين كما يقول القانون وفي تطبيق العدالة الانتقالية ما إنجموش نقولو إلی القانون الجديد ما يطبّقش على الجرائم القديمة وإلا المجرمين خذاو عفو قبل وإلا الجريمة حكّم فيها القاضي قبل وإلا الجريمة والعقاب تعدّات عليهم مدة طويلة.

**الفصل 149.** تكمل المحاكم العسكرية تخدم خدمتها حسب القانون متاعها حتى لين يتبدل كما يقول الفصل 110 مالدستور.

وانشالله ربّي يوفقنا